



LAVRENTII  
GAMBARAE  
BRIXIANI  
CAPRAROLA.



ROMAE,  
Apud Franciscum Zanettum.  
M D LXXXI.

AD ALEXANDRVM  
FARNESIUM  
CARDINALEM.



**N**ON Orientis opes cupio, fastesve, nec annos  
Nestoris, aut valida regna subacta manu.  
Sit mihi sat laudesq. tuas, & facta tuorum,  
FARNESI, nostris texere carminibus:  
Sit Caprarolæ sedem dixisse superbam,  
Qua nullum Europa clarius extat opus:  
Viueret hanc vitam sub te, mea lumina donec  
Aeternam in noctem clauscrit alta quies.



AD ALEXANDRVM

Farnesium Cardinalem

Laurentij Gambaræ

Brixiani

CAPRAROLA.



Vm nos te canimus, præclaraq. fa-  
cta tuorum,  
Et positam Cimini letis in collibus ar-  
cem,

Farnesiæ gētis sidus, columenq. meumq.  
Præsidium, & semper summis exercite rebus  
Maxime ALEXANDER: tu vati assiste carenti,  
Hic inter gelidos fontes, platanumq. comantem,  
Gratior æstiuos qua temperat aura calores,  
Et nemorum placidis percurrit flatibus umbras,

Aduentu tepidi Veris latissima tellus,  
Aggèribus modo quæ niucis obducta rigebat,  
Fronde noua, & multo aspirans fragrabat odore,  
Atq. catervatim subter nemora alta volucres  
Lætæ exercebant mira dulcedine cantus  
Desuetos ob longam hiemem, siluasq. nivales,  
Et noua carpebant stabulis armenta relictis  
Gramina, & e viuīs hauribant fontibus undas:  
Cum Ladon (cui mille greges ad flumen Helori,  
Tercentum & tauri supra latera alta Pachini  
Pascebant virides herbas) dilecta reliquit



Littora Trinacriæ, genero comitatus Aceste ,  
In primis consanguineos vt cerneret, vtq.  
Ante alias Urbem egregiam, sceptrisq. potentem ;  
Quam vetus Hetruscis interluit Albula lymphis.  
Magnorum hic postquam vidit monumenta Quiritum  
Disiecta, & prolapsa solo, rerumq. ruinas  
Ingemuit, dirum exitium miseratus, & urbem,  
Arripuitq. viam tendens ad Thybridis amnem,  
Hospitiæ memor antiqui ; visurus eosdem  
Mane locos, cum iam pulsus aurora rediret  
Crastina sideribus, lux atq. immissa tenebras  
Discuteret piceæ noctis . Tunc Thybridis altas  
Exigua rate vectus aquas tranauit, Aceste  
Sicanio comite : & magni deuenit ad hortos  
FARNESI , quorum custos erat Umber Helenor ;  
Tectaq. confestim sera sub nocte petiuit.  
At custos cari aduentu lætatur amici ;  
Atq. virumq. iubet domini succedere tectis .  
Protinus hos mensis, gazaq. accepit agresti .  
Tunc læti inter se dapibus vescuntur inemptis,  
Et rebus, quas hortus heri sæcundus alebat.  
Postquam pulsa fames, sublataq. rustica mensis  
Tocula, & agrestes epulæ, sic orsus Helenor:  
Quæ, Ladon, tibi causa viæ ? quo tenditis ambo ?  
Dic age quid venias . an fors te aduersa fatigat ;  
Inuitumq. alios cogit te quærere fines ?  
Nam cæpere tuo capiti canescere crines.  
Quàm lator te nunc subiisse hæc regia tecta ?  
Non scelus eluimus, reddit cum talia Ladon ;  
Nec nos exilium patrijs à finibus arcet .  
Hanc nos consilio vnanimis accessimus urbem.



Est hic & cantu, & calamis præclarus Acestes,  
 Et lati diues fundi, nemorumque, gregisque;  
 Qui gener est, sociusq. vie, pariterq. laboris.  
 Sanguine coniunctos nobis huc venimus ambo  
 Visere, & hanc præclaram Urbem: nos nauita ab oris  
 Sicanijs patrius Tyrrhena per æquora vexit  
 Thybridis ad Tusci fauces: pontoq. remenso  
 Ille idem in patriam Tyrrhena per alta reducet:  
 Cras & eris noster comes, & dux, hospes Helenor.

Interea fuscis cum nox iam nigra tenebris  
 Obducit calum & terras, surgamus, & vna  
 Corpora iam placida demus defessa quieti.

Tunc Ladona petijt dextra, comitemq. sinistra  
 Hospes, & hæc inquit: Cum Sol cras prima relinquet  
 Littora, & has circumlustrabit lumine ripas,  
 Addam me vobis socium, & per singula ducam:  
 Nec toties audita mihi narrare pigebit.  
 Hæc ait, atq. illos stratis, thalamoq. locauit.

Sed postquam Sol tellurem, calumq. reuisit  
 Crastinus, ætutum stratis, placidoq. sopore  
 Corripiunt sese; atq. domos mirantur, & hortos  
 FARNESI, & iuxta labentes Thybridis vndas.  
 Tunc custos horti lætus sic fatur Helenor:

Hæc domus, atq. horti sunt inter flumen, & altum  
 Ianiculum positi, quos tu prope conspicias. est fons  
 Deducens liquidas Tiberino a gurgite lymphas,  
 Hosq. rigans virides hortos, ceu riuus abundans.  
 Mænia sunt Libyam contra, qua Septimiana  
 Est regio. his nostris non Africus ingruit oris,  
 Sine calore graui premitur, seu frigore tellus:  
 Seu placidi spirant Zephyri, non æstifer vrit

Hos hortos canis; at semper viret humida tellus.  
 Hunc cerne Alcidem Atlantis vastâ ferentem  
 Pondera, & æthereos axes, duodenaq. signa.  
 Has olim PAVLVs subter FARNESIvs vmbra,  
 Omnes qui sacro populos, gentemq. regebat  
 Romanam imperio, toties conuiuia duxit;  
 Vel iuxta hunc fontem, fluiuique ad Thybridis vndam,  
 Tempore quo Thybris felix in lata fluebat  
 Aequora, & hanc claram placidis decursibus Urbem  
 Scindebat, lætusq. suo gaudebat alumno.  
 Aspice & hæc veterum conuiuia lata deorum;  
 Quos olim incassum coluit gens inscia recti,  
 Quæ pinxit Raphael Urbinas clarus in arte  
 Pictura, atq. etiam sublimia tecta, viasq.  
 Hortorum, & varijs redolentes floribus hortos.  
 Augurat & mea mens eadem felicia sæcla  
 Esse olim reditura iterum, lætamq. per Urbem  
 Collibus impositam septem fluet Albula latis  
 Vorticibus, cum magnanimum de stirpe nepotem  
 Prospiciet PAVLI Lauinia regna tenentem.  
 Sæpe & ALEXANDER sedem hæc inuisit, & hortos,  
 PAVLI ipsa de prole satus; lumenq. Senatus  
 Purpurei; & totos horti per compita Soles,  
 Aut subter platani frondosa vmbacula condit.

Aspice odoratum citri nemus: aspice poma  
 Aurea, quæ non sunt vigili seruata draconi.  
 His semper ramis partim sunt mitia, partim  
 Immatura virent: nec desit fertilis arbor,  
 Omnigenos fert ipsa suo quo tempore fructus.  
 Hic & humus vario florum persusa colore  
 Ridet, & increpitat tarde surgentia Veris



*Tempora, & Hesperijs spirantia flamina ab oris.  
Sed Veris producit opes, herbasque, prius quam  
Adueniat Ver purpurcum, Zephyriq. tepentes.*

*His dictis, Tiberis tranarunt flumina cymba  
Exigua, celsas sedes, & regia tecta  
Visuri, quæ iam PAVLVS FARNESIVS olim  
Condidit, hac quondam clara regnator in Urbe.  
Tunc admirantur referentia marmora viuos  
Herculeos vultus, stricto & mucrone sub altis  
Porticibus stantes nudato corpore Thracas.  
Zetus hic, Amphionq. intorto spumea fune  
Indomiti bouis ora tenent, seuamq. nouercam  
Inuisam matri arripiunt, longeq. furentis,  
Atq. reluctantis toto cum corpore Dircen  
Fune ligant collo tauri, miseramq. fluentem  
Proiecere in aquam, quæ Dirce nomine dicta est.  
His etiam hospitibus comitem sese addidit Idas,  
Romulidum priscos doctus cognoscere vultus,  
Quos olim è saxo sibi finxit, & ære vetustas.*

*Alloquitur comites custos sic arcis Helenor:  
Has solido varias spectate è marmore formas.  
Hic sunt egregij ciues, quos inclyta Roma  
Produxit claros olim terraq. marique;  
Quorum hic sunt capita Oebalio de marmore tantum.  
Hoc caput ultoris Bruti est: stat Cæsaris illic;  
Pompei stat parte alia; iuxtaq. Cupido,  
Quo non Ausonia tota est formosior alter.  
Hic Pan Dametam calamos percurrere labro  
Edocet, egregius fama quem Batrachus olim  
Cælauit lapide ex Phrygio. hic Cypris Amori  
Eripit e manibus arcum: procul aspice Ladon,*



Delphinum dorso puerum super alta ferentem.  
Hæc rerum est Natura parens e marmore viuo.

At postquam cuncta hæc illis monstravit Helenor,  
Ille viam secuit Capitolia ad alta Quiritum.

IESU

Dumq. irent, celsa aspiciunt tesludine templum,  
Templum operosum, ingens, quod religionis amore,  
Diuini & cultus studio inflammatus, in Vrbe

Condit ALEXANDER mira FARNESIVS arte;  
Quod nostra, & ventura olim mirabitur ætas.

Deinde alacres intrant renouata palatia montis;  
Romulidumq. vident bello parta inclyta regna,

Atq. ex ære lupam, præbentemq. vbera natis  
Ex Rheæ quondam genitis; vbi marmore Cæsar

Cælatus, pariterq. Augustus, & Herculis ingens  
Ex ære effigies. hic Bruti, hic signa Quiritum

Plurima sunt, partim e saxo, partim ære nitenti.

O Ladon, olim celebratam hanc aspice rupem  
Tarpeiam, quam nunc pascuntur equiq. gregesque.

Hac in parte forum Romanum conspice; vendi  
Nunc solita hic certis armenta, gregesq. diebus.

Aspice Auentini sedem, quo Cacus abegit  
Alcide (vt perhibent) tauros: & multa domorum

Tecta vbi sunt, vada scindebat tunc lata paludis  
Nauta rate hos inter præcelso vertice colles.

Tantum tempus edax valet, & longinqua vetustas,  
Valle erat hac olim tenebrosa atq. alta vorago;

In quam vectus equo, saltu se Curtius armis  
Incinctus dedit, afflicte commotus amore

Ante alios patriæ, quæ se magnoq. timore,  
Et luctu soluit, terræq. coiuit hiatus.

Hanc summæ partem montis liquere, petuntq.  
Partem

Partem aliam, qua Romulidis dat iura Senator;  
 Ad comitesq. suos inquit conuersus Helenôr:  
 Hilæua, ac dextra positi de parte gigantes,  
 Fluuiorum duo sunt simulacra e marmore, quorum  
 Bellando vicit Romana potentia terras.  
 Hæc autem PAVLI est niueo de marmore imago  
 FARNESI: hic quondam mitis moderator in Urbe  
 Qui fuit, & rerum prudens; cui sponte dicauit  
 Hoc Capitolina simulacrum in sede Senatus  
 Romanus, populusque, quod instaurauerit Urbem  
 Romulidum, multasq. vias quod strauerit; illasq.  
 Ornarit; quo pestiferas non amplius auras  
 Roma auctore timet, prius vt miserranda timebat.

Hæc est effigies pario de marmore magni  
 GREGORII, qui dum ius sacra hac redderet vrbe,  
 Iustitiam semper coluit: mox vectus ad altam  
 Pontificum sedem, placidis inflectit habenis  
 Hanc urbem; quæ nunc tanto sub principe floret.

Aureli ex ære effigiem mirantur equestrem;  
 Septimijq. vident monumenta, & fortia bello  
 Fornice in excelsò facta, & præclara trophæa  
 Parta manu, & varios habitus, atq. arma, tubasque:  
 Ferratoq. vident disiectos ariete muros.  
 Deinde Palatini vertunt ad culmina gressus,  
 Et gratò accepti hospitio, sic fatur Helenor:  
 Hic locus est, vbi longæuus Rex condidit olim  
 Euander primas arces, lætusq. recepit  
 Hospitio profugum Aeneam. hic magnus ab oris  
 Hesperij's rediens olim Tirynthius gdes  
 Inuisit, quas tunc Euander Grauius habebat.

Hic erat imperij sedes; hic sceptrata tenebant

Romu-



Romulidum primi Reges: hic proxima calo  
 Tempia Iouis Statoris erant. hic parua Quirini  
 Regis erat domus, atq. aliorum tecta Quiritum  
 Ardua, fulta auro, & Phrygijs decorata columnis.  
 Hic sedem egregiam, rerum dominator habebat  
 Augustus; montisq. sub hac radice fluebat  
 Tyrrhenus Thybris, qua Dardanis Ilia natos  
 Indoluit fluuio expositos; quos Faustus alto  
 Aspectans limo, qua parte recesserat amnis  
 Sustulit, infanteq. lupa nutricis alumnos  
 Instabula alta tulit, præberet ut vbera coniux.

Pons erat hic etiam, qui coniungebat utrosq.  
 Hos colles, qui fornicibus, pariterq. columnis  
 Marmoreis innixus erat: vestigia cuius  
 Certa extant nunc: hos inter fundarat asylum  
 Romulus, hac vos parte etiam spectabitis hortos  
 A dextra partim irriguos, queis maximus olim  
 Circus erat, quo certamen nauale solebant  
 Romulide, inq. lacu belli simulacra ciere.

Hæc montis pars, quæ Tiberim, Capitoliaq. alta,  
 Romanumq. forum spectat, concessit in usum  
 Hortorum; tecta oblectant hæc diruta quondam  
 FARNESIVM. Posthinc digressus monstrat Helenor  
 Parte alia templi vestigia plurima Pacis;  
 Fornice & excelso Solymę spolia inclyta gentis,  
 Et candelabrum, & diuini fœderis arcam:  
 Bissenos spectant fasces, totidemq. securæ:  
 Et Constantini præcelso in fornice pugnas:  
 Conspicuumq. altumq. Titi, & patris amphitheatrum.  
 Inde Quirinali viderunt colle superbos  
 Quadrupedes; & virgineos gener hausit Acestes

Cum



Cum socero latus latice: Neruaq. columnas  
 Traiani, atque Antonini, iuuenisq. theatrum  
 Marcelli, & tumulum Augusti, molemq. Adriani.  
 Deinde viam carpunt ad culmina Vaticani;  
 Pyramidemq. vident inuicti Cæsaris, edemq.  
 Egregiam excelsamq. Petri, cum luce sua Sol  
 Stellantis medium spatium superasset Olympi.  
 Et templum ingressi submisso poplite summum  
 Aeterni patris numen venerantur; & illud  
 Immensum mirantur opus. Mox inquit Helenor:  
 Tertius hanc statuit PAVLVS FARNESIVS aram:  
 Hanc sibi præterea effigiem fuluo ex oricalcho  
 Cælatam tumulo imposuit; quæ læta referret  
 Ipsius ora senis, sacriq. insignia regni.

Aspice & hanc aram, sub qua venerabile patris  
 Est Nazianzeni corpus; circum aspice molem hanc  
 Tanario tecta e saxo, geminasq. columnas,  
 Insigniq. locum pictura, vt cernitis, auroq.  
 Ornatum & signis; opus admirabile magni  
 GREGORII, genuit quem Felsina, regia quondam  
 Lydorum sedes: humili qui transtulit ipsum  
 Ex tumulo, & tumulum dedit hic, aramq. dicauit,  
 Prouentusq. dedit multos, posuitq. ministros  
 Qui facerent rem diuinam, canerentq. diebus  
 Continuis laudes patris omnipotentis ad aram:  
 Atq. illos cantu voces inflectere iussit,  
 Et numeris sociare suis pulsa organa palmis.

Hic fudere preces genibus MARIAEQ. Deoq.  
 Aeterno vnanimis flexis. tu respice, & audi  
 Has nostras pater alme preces, daq. insuper vt nos  
 In patriam incolumes felix tua dextra reducat.

Et tu Stella maris, duce qua non territus horret  
 Nauita puppe secans freta formidata Charybdis.  
 Alma Dei genitrix rege nos : age tu quoq. ad aures  
 Nazanzene refer hæc summo nostra parenti  
 Tenuia verba licet, vt nos foueatq. tegatq.  
 Adueniat donec nostræ meta vltima vitæ.

Mox celsas superant sedes, atq. aurea summi  
 Tecta patris ; quibus inspeçant cincta atria longis  
 Porticibus; sedesq. Pio iam principe Quarto  
 Insubri erectas, atq. addita mœnia monti :

Hic vbi Laocoonta vident ; Phœbumq. sagittas  
 Tendentem; atq. alias calato ex marmore formas.

Hæc vbi sunt spectata satis, descendit Helenor  
 Cum socijs; portamq. petit, si desq. superbas  
 Visurus, quas Tyrrenus fundauerat olim  
 Septimus his nostris Clemens Etruscus in oris :  
 Principibus loca grata, canis cum letifer alto  
 Se tollit cælo, & rapidis coquit æthera flammis :  
 Non longe qua pons Tiberini Miluius alto  
 Fluminis herbosas coniungit fœnice ripas :

Hic primum ante fores inuitat Helenora custos  
 Hospitio, comitesq. simul ; subeuntq. superbis  
 Porticibus; quos ille manu complexus vtraq. est.  
 Dum veromensas ponit prope murmura fontis,  
 Atq. epulas parat agrestes Laurentia coniux  
 Almonis (cui ruris erat data cura beati,  
 Hortorumque, domusq.) viros ducebat Helenor  
 Compita per, longasq. vias, subterq. virentum  
 Silvarum ramos, & per vineta, cauasq.  
 Conualles ; variosq. ortus monstrabat aquarum,  
 Quæ passim humectant beneolentes floribus hortos,

Et

Et stagna efficiunt, quibus innatat humida ponti  
 Progenies, gaudetq. nouis colludere lymphis;  
 Signaq. prospiciunt viuos imitantia vultus:  
 Quorum oculos spectata diu pictura tenebat,  
 Quam tecti interior paries sublimis habebat.

Singula sed postquam lati aspexere, reuifunt  
 Almonem, quos ipse domi expectabat. at illos  
 Ut vidit, celer occurrit, dextraq. prehenso  
 Adducit, positisque iubet discumbere mensis;  
 Qui dapibus, simul & grato sermone fruuntur.

Ut vero sublatæ epulæ, sic fatur Helenor:  
 Si vobis sedet hoc, cum terras lux noua Solis  
 Lustrabit, nitidoq. dies albescet ab ortu:  
 Hinc Caprarolæ celsas tendemus ad arces,  
 Quas struit insignis fama FARNESIVS inter  
 Siluarum longos tractus, montesq. Capenos.  
 Hanc prius æthereo quàm Sol decedat Olympo,  
 Optatam à nobis non fessi intrabimus arcem.  
 Tunc contra Ladon paucis respondet, & insit:  
 An magis optarem patrios inuisere colles,  
 Has an vulgatas viroq. a littore fides  
 Oceani, dubia est nostræ sententia mentis.  
 Sed tamen hanc arcem visendi immensa cupido  
 Me tenet, & generum pariter. nam sæpe Nealcem  
 Audiuì, qui pascit oues per prata Panormi  
 Florea, tollentem cælo surgentia tecta  
 Hortorum, & pariter laudes rarisq. canentem,  
 Atq. Aegocrenes fontem, pariterq. perennes  
 Fontis Acidaliæ picto sub fornice lymphas.

Tunc Almo, Surgamus, ait; nam rescida luna  
 Fulgentis passim cæli spatia ardua pulsât:



Et fessi optato se composuere cubili.

Iam reuoluta dies matura luce rubebat;  
Et iubare infuso lucefcere cæperat omnis  
Terrarum, & pelagi tractus, radiantiq. alti  
Tecta poli; cum sopitos somnos excitat hospes.  
Illi alacres surgunt stratis, quibus Italus Almo  
Monstrat iter breue per colles, florentiaq. arua.  
Deuenero nouas sedes, operosaq. magni  
Atria FARNESII, cum Sol declinis ad oras  
Flecteret Hesperias sese, noxq. atra rediret.  
Mox superant placidum collem; Tuscumq. Lycormam  
Textentem inueniunt frondosa vmbacula fontem,  
Fontem Aegocrenes circum, rigidaq. secantem  
Siluestres serra truncos, scissiq. flagella  
Summa immittentem fecunda ex arbore ramis;  
Insita vt e proprio trunco, tunc fertilis arbor  
Ignotas frondes, ignotaq. poma sub auras  
Effferret, decora hortorum, siluæq. virentis.

At postquam ante oculos conspexit Helenora custos,  
Hortorumq. domusq. opera interrupta reliquit,  
Atque illum amplexus medium, sic ore profatur:  
Te Vere aduenisse nouo quam lætor Helenor,  
Vt possis hortos florentes cernere, nuper  
Quos nostra coluere manus: quoq. ordine flores  
Sint positi, vel culta quibus mage gaudeat herbis  
Area, & vt sepes niueo intertexta ligustro,  
Et lauru, myrtoq. pari. nam cetera nostri  
Communis iussu domini distincta videbis.

Hæc fert purpureos Autumnii tempore flores  
Area lata croci, qua non fecundior ulla  
Est circum hos lætos colles, longinquaq. circum

Hæc loca: non illum florentem interficit aut mus  
 Agrestis, vel talpa nocens, aut noxia monstra,  
 Quæ passim terra alma creat sitientibus aruis.  
 Et sicut Veris decus est rosa, sic crocus ipse  
 Autumni decus est, pictis cum floret in hortis,  
 Sed quia sera dies una cum Sole recedit,  
 Et duplicat densas nemorosis vallibus umbras,  
 Ad sedem tendamus iter. Tunc inquit Helenor:  
 Adduxi mecum hos socios, qui Dædala signa,  
 Atq. hortos, dominiq. domos ad Thybridis amnem  
 Viderunt, & tecta alta olim, nunc diruta passim:  
 Has etiam duce me cupierunt visere sedes,  
 Quas olim Siculus laudauit sæpe Nealces,  
 Et pastoralis vexit super æthera cantu.  
 Tunc horti custos fatur sic ore Lycormas:  
 Has inspecturos ades non miror ab oris  
 Trinacriæ venisse viros: nam seu coquit agros  
 Sirius, aut passim grauib. rubet una racemis,  
 In glacie seu vertit hiems stagna alta Padusæ;  
 Seu cum terra tumet Zephyro spirante; frequentant  
 Visendi has studio sedes Romanus, & omnis  
 Ausonia, atq. Tagi quisquis bibit accola fontem;  
 Quiq. bibunt Ararim, Rhenique, Istriq. fluenta,  
 Mox celsas subiere domos; mensamq. Lycormas  
 Consortem thalami iussit sub aperta parari  
 Atria, quæ spectant Nepetam, Soractis & arces  
 Aerias; illosq. iubet discumbere mensis.  
 Tunc coniux Aegle celso sub fornice lychnum  
 Suspendit, struit & mensam, libumq. ministrat  
 Conditum melle Hyblæo, & beneolentibus herbis;  
 Desrutaq. antiquum longe redolentia vinum;

Et sale terga suis durata apponit, & agni  
Pectus, & albentes armos; qui gramina nondum  
Carpere, nec patrijs stabulis exire solebat.  
Huic mensæ non pinguis anas, chortisq. volucres,  
(Quos tales custos tecti seruarat in usus)  
Desuerunt; non ruris opes: namq. inclytus olli  
FARNESIVS dederat mandata, vt siquis ad ipsas  
Visendi studio celebres accederet arces,  
Non illum, comitesve suos prohiberet aperto  
Hospitio. mox accelerans mollissima desert  
Vina Micon, cellis non cedere sueta Falernis:  
Quæ circum vineta ferunt, collesq. Capeni:  
Detulit & succos vitis, quam maximus olim  
Syllano Paulus consenuit rure propinquo.  
Vt vero ventum est ad mensæ dona secundæ,  
Vimineos nucibus calathos, pariterq. volemīs,  
Castaneisq. pirisq. Micon, Rhodiaq. rubenti  
Implet, & apponit quadris: nec plurima ibi nux,  
Vel radij desunt, opulentaq. copia pressi  
Lactis, amineumq. nouum de palmitē nectar  
Collectum. at postquam dapibus consuetus edendi est  
Pulsus amor, surgunt mensis, varioq. fruuntur  
Colloquio inter se, donec sopor aliger artus,  
Illorumq. oculos premeret. tunc ipse Licormas  
In thalamum socios duxit, stratisq. locauit.  
Humida iam summo nox decedebat Olympo,  
Ducebatq. rubens terris Aurora nitentem  
Clara diem; atq. hortis volucres, siluisq. canebant,  
Implebantq. nouis nemorum concentibus umbras:  
Nec caueis inclusa canis philomela silebat,  
Cum vigil ex humili strato surrexit Aestes,



Et Ladon aperit iubar exoriente fenestras;  
 Pacatumq. videt caelum, caliq. serena,  
 Aeraq. ingenti plenum dulcedine Veris  
 Aduentu: & vertens oculos prospexit in hortis  
 Stringentem sepes, & odora rosaria falce,  
 Et transportantem plantaria viua Lycormam.  
 Tunc generum, pariterq. acciuit Helenora Ladon;  
 Unanimesq. petunt iuxta sata culta Lycormam  
 Luce laborantem prima: qui protinus illos  
 Ut vidit, medio sese tulit obuius horto,  
 Atque opus inceptum liquit; dehinc talia fatur:  
 Haud volui vestros, dum nox tenet aethera somnes  
 Rumpere, Sol herbis infuso lumine donec  
 Decuteret gelidum rorem per lubrica prata.  
 Hæc dicens illos in regia tecta recepit.  
 Tunc scandunt scalas, quarum formatus in amplum  
 Est orbem ascensus facilis, placidusque, vbi magnum  
 Sclarum in medio spatium, circumq. columnis  
 Incinctum validis, necnon & fornice lato.  
 In primis intrant vbi sunt sub fornice celso  
 Porticibus circumpietis duodena Quiritum  
 Tanario signa e saxo, referentia viros  
 Illorum vultus, Romam qui & littus Eoum,  
 Necnon Hesperium imperio tenuere superbo.  
 Mox templum angustum subeunt, & numen adorant  
 Suppliciter Patris æterni: tunc voce Lycormas,  
 Atque manu socijs mirantibus explicat omnem  
 Picturæ seriem spirantis, & edocet artem:  
 De nihiloq. Deum æternum vaga sidera, & altum  
 Aethera, & Oceani tractus, terrasq. creantem,  
 Et Solem, lunæq. globum, volucresque, ferasque;

Formantemq. hominem manibus, thalamiq. iugalis  
 Consortem ex costa ipsius, cum duceret altum  
 Adam stratus humi viridante in gramine somnum.  
 Ille etiam pictosq. viros monstravit in aede  
 Bissenos, olim fidei fundamina nostra.  
 Parte alia Deus omnipotens in marmore vasto  
 Immergit Pharias una cum Rege phalangas.  
 David Idumgeos sibi ferre tributa coegit,  
 Quos nuper sumptis bellando vicerat armis.  
 Aspicite hanc puppim, Noe quam condidit olim  
 Mandato patris aeterni; quæ non habet alas  
 Velorum; quæq. est etiam sine remige; clauusq.  
 Haud regit hanc mare per tumidum, pelagiq. procellas;  
 Cum venti posuere, ratem non anchora fundat:  
 At regit hanc Dominus, quæ semina cuncta ferarum;  
 Quæq. colunt silvas volucrum, & de sanguine Adami  
 Octo animas tantum clausit, cum uertice ab alto  
 Perpetuus rueret piccis e nubibus imber,  
 Et tegeter terras, nec non animalia, cum iam  
 Flumina nec ripas, nec littora pontus haberet.  
 Aspicite Abraamum summa de parte tenentem  
 Ensem nudatum, & puerum mactare volentem.  
 Nuntius e calo delabens depulit ipsi  
 Mortem intentatam puero Isaac: mox ubi vultus  
 Sustulit ipse Abraam, positi tergum cornibus inter  
 Uepres incuruis aries est visus, ad aramq.  
 Adductus, vice qui pueri cultrum imbuat alto  
 Vlnere, & aeterno sacrata est victima Patri.  
 De Cruce depositus iacet hic (ut cernis) IESVS  
 Quem iuxta fundens lacrymas gemit anxia mater,  
 Atque dolet nati funus crudele perempti:

Et deflent crinem effusa per colla sorores.

Mox intrant domini sedes, aulamq. patentem;  
Atque vocant custodem arcis, qui singula norat  
Farnesie tot facta domus vulgata, genusque.  
Hic ubi præclaram FARNESI ex ordine gentem  
Spectat Alexandri Ladon, titulosq. parentum  
Aut bello, aut pace emeritos, aut fortia facta  
Ante oculos; sistitq. pedum vestigia, & infit:

Hanc seriem rerum immensam ne pœnitcat te,  
Quam circum pictam aspicio, memorare, Lycorma.  
Ille autem paucis picturam ex ordine dictis  
Edocet, antiquam referens ab origine prolem  
Sanguine, & illustrem factis. En aspice, dixit,  
Hos circum Heroas, quos belli gloria duxit  
Astra super, toga vel sacro insigniuit honore.

Hic Guido veterem tenuit Farnesius urbem  
Imperio, quem primores, populusq. vocarant  
In regni sceptrum; quos iam discordia ferre  
Inter se (infandum) scelerata coegerat arma.  
Hic solitam in sedem ciues, urbiq. salutem  
Reddidit, & finem posuit civilibus armis.  
Ranutium hunc bello Quartus præfecit, & armis  
Eugenius, cui post rebus feliciter actis,  
Ex auro radiante rosam transmisit habendam  
Ob meritum, quæ haud sueta dari est nisi regibus olim,  
Et ducibus, quos iam virtus super æthera vexit.

En Petrus, quem clara ducem Florentia bello  
Fecerat, ingreditur cunctis plaudentibus urbem  
Pisarum, duce captivo, cæsisq. triumphans  
Hostibus. Hic etiam Rainerius eligitur dux  
Agminis Etrusci, cum bello clarus, & armis.



Germanus cali lumen liquissit, & auras.

En alter Petrus, qui susus hostibus urbis  
Romanae, prolapsa Cosi iam mœnia bello  
Restituit, ducens Uulsini ex urbe colonos:  
Victricis pugnae monumentum, aeternaq. facti  
Pregia. Nicoleon etiam Mauortis alumnus  
Aspice, qui bello Romani principis hostes  
Fudit, & ad mortem duro in certamine traxit;  
Felsineamq. urbem longa obsidione leuauit.

Hic vir hic est PAVLVs præclari nominis huius  
Tertius, Aeneadum princepsq. & rector ouilis  
Aeterni Patris, quo non præclarior alter  
Urbe fuit, quam cœruleis secat Albula lymphis:  
Seu sacros inter procures cum incederet osro  
Insignis, seu cum Lauinia sceptrâ teneret,  
Et Romam facili imperio: geminosq. nepotes  
Auxilio Caroli Germanas misit in oras,  
Impia quem contra Germania verterat arma.

Cernis ALEXANDRYM dextra, fratremq. sinistra  
Cesaris armatum ferro, sepiusq. cateruis  
Bellatorum equitum Caroli iusta arma sequentes?  
Lutetię hic etiam primum est Legatus ad oras  
Missus ALEXANDER, quo Cesar venerat, & Rex  
Gallorum sumptis acer Franciscus in armis:  
Discordesq. illorum animos pacauit, & ambos  
Fœdere coniunxit firmo. Procul aspice gentis  
Farnesie defensore, cui bellica paret  
Gallia: & hunc etiam generatum Cesare Regem,  
Qui res Farnesie stirpis seruauit, & auxit.

Hanc dat ALEXANDRO florentē ciuibus urbem  
Farnesio, irriguis quam Parma interluit undis,

Roma.

Romulidum Latij's quondam regnator in oris  
 Iulius; ille autem fratri dat habere, suumq.  
 Ablatumius restituit, & debita sceptrum.

Hanc sibi coniugio sociavit Horatius armis.  
 Maximus. Hęc autem Carolo sata Cesare virgo,  
 Est ducis Octavi coniux. Hic PAVLVs in aurea  
 Sede sedens procures inter, sanctumq. Senatum,  
 Petro Aloysio primos decernit honores  
 Militię, Castriq. Ducem creat. Et puer vna  
 Romanę efficitur pæfessus Horatius urbi.  
 Qui quamvis puer esset adhuc, tamen ille dabat spem  
 Indolis, & clarum specimen virtutis; & omnes  
 Aequasset proavos, animi quoque robore, ni mors  
 Hostes tendentem contra stravisset abeno  
 Tormento: cecidit quo flos, robarq. iuventæ  
 Ausonię, quę sub Gallorum rege merebat.

Hanc etiam partem, Ladon, spectabis, & vrbes  
 Has geminas, PAVLVs quas dono tertius olim  
 Petro Aloysio cessit, stirpiq. future  
 Illius. Hos bello insignes Farnesia proles  
 Edidit, Heroasq. alios in luminis auras  
 Hęc gens præclara eduxit bellique, togęq.  
 Egregios, quorum Europe vaga fama per oras  
 Didita Farnesiam gentem super æthera tollit.  
 Parte alia PAVLVs sacrorum rector, & Urbis,  
 Concilium prisco sacrum de more coegit.  
 Hic Perusinam urbem domuit; Carolumq. recepit  
 Hospitio hic quintum, Libyę qui victor ab oris  
 Depulso veniens in regna reduxerat hoste  
 Tuneti Regem. Hic geminos in fœdera Reges  
 Discordes olim, firmo tunc fœdere iunxit.

Hic mouet & Venetorum animos, & Cæsaris, vt se  
Ad bellum accingant secum, contraq. tyrannum  
Arma ferant, qui regna tenet tot maxima duro  
Imperio, intortis quæ scindit cursibus Ister,  
Tot maris Ionij tractus, tot littora, & vrbes.

Ob veterum decreta patrum violata, nouosq.  
Inductos regno mores hic Paulus ademit  
Tertius Henrico Octauo regalia iura,  
Brittannos qui tunc populos diuione premebat.  
Paulus Alexandrum Tyrio insigniuit honore,  
Necnon Ranutium fratrem; multosq. senatus  
Purpurei procures tali decorauit honore.

Horum autem sacro delecti ex ordine Patres  
Quattuor antiqui tenuerunt sceptrâ Latini;  
Et positas septem tenuerunt collibus arces.  
Diuidit hic paries partes in quattuor annum:  
Gramine se hic vestit tellus, & frondibus arbos;  
Demessas ferro hic campis terit area fruges;  
Demetit hic mites in aprico colle racemos;  
Asperat hic gelidis Boreas afflatibus undas.

Hic paries Crucis ostentat mysteria, Christumq.  
Hebræo populo diuini semina verbi

Spargentem, magniq. patris præcepta docentem.

Postquam bisenos comites, testesq. laborum,  
Atque suorum operum Christus delegit, ab alto  
Descendit monte, atque loco vestigia fixit  
Campestri, quo gens aderat quamplurima ab oris  
Sidonijs, Tyrijsque, freti quas alluit vnda;  
Et gens, quæ ripas habitat Iordanis, vt ipsum  
Audirent Christum vitæ præcepta docentem  
Aeternæ; vtq. illos crudeli tabe lenaret,



Obstruētasq. aures aperiret; vincula lingue  
 Solueret, & gressus firmaret vt ille labantes;  
 Pelleret obfisso deformia pectore monstra,  
 Aetherea gentem deiectam e sede profundum  
 In barathrum Patre ab aeterno, quando ille superbum  
 Ob factum pœnas inimica a gente recepit.  
 Duxere hi vitam in siluis, vel rupe sub alta,  
 Semoti procul a patria, rerumq. tumultu.  
 His etiam populis Salomon dat mystica iura.  
 Illic sunt etiam sapientum dicta virorum;  
 Atque illis similes vultus in pariete picti.  
 Hic matri Salomon infantem adiudicat; illamque,  
 Quæ vere non mater erat, puerumq. petebat  
 Abscindi in geminas præsenti a iudice partes  
 Licetoris gladio, clamantem reppulit acri  
 Iudicio; matriq. dedit, quæ mæsta retabat  
 Discindi puerum ferro, quod licetor habebat  
 In manibus: veræ nam sunt commota parentis  
 Viscera, quæ haud poterant fera cernere funera nati.  
 Hic Saulem iussu Domini, qui temperat axes  
 Aethereos, & sæcla hominum, terrasque, fretumque:  
 Acceptumq. Deo Dauidem Samuel vnxit  
 Hebrai in Regem populi, Dominumq. colentis.  
 Davidis ante pedes cithara est, qua rumpere suctus  
 Vocem erat, & dulces nervis intendere questus.  
 Hic statuit Moses certos hac parte tribunos,  
 Qui populis noua iura darent, rectumque, piūq.  
 Seruarent, litesq. nouas componere vellent.  
 His etiam terris fixit tentoria Moses;  
 Et statuit legem populis, quos nuper ab oris  
 Duxerat Aegypti. Iethro duo pignora duxit,

Et Sephoram uxorem genero; castrisq. recepit  
 Hunc Moses. cernensq. socer dehinc luce sequenti  
 Tot circum populis vnum illumiura ferentem,  
 Pondere sub tanto paruum haud perferre laborem;  
 Admonuit generum vt vellet præferre tribunos,  
 Qui populis causasq. leues, facilesque, remotis  
 Muneribus, precibusq. rei, vel amore suorum,  
 Audirent; non luce sacra, certisve diebus:  
 Atque exercerent aequa lance supremum  
 Iudicium: leges Moses, & sacra doceret.  
 Difficili in causa iudex instructus adiret  
 Ipsum ductorem gentis, rerumq. magistrum.

Pectore flammam acrem Sampson concepit amata  
 Virginis, ob faciem egregiam; cui credidit vni  
 Ipse suos sensus arcanos, & male cautus  
 Detexit viresq. suas, roburq. iuuentæ,  
 Concessum haud vnquam dono mortalibus vllis.  
 Dilectæ sed genua super gremiumq. soporem  
 Dum dulcem captat Sampson; illa impia crinem  
 Nudato abrasit ferro, cassumq. reliquit  
 Viribus, actutumq. illum nil tale putantem  
 Reppulit, & fugiens Philistin castra petiuit.

Cernite quæ insomnis Pharaon vidisse putarat,  
 Ingenti e Nili fluuio prodire iuencas  
 Septenas numero pingues, & iunca pasci  
 Pabula; septenasq. alias dehinc flumine eodem  
 Confectas macie prodire; inuadere quæ sunt  
 Ausæ illas, auidoq. actutum absumere morsu.  
 Quæ portendebant septem cum frugibus annos  
 Venturos, septemq. alios sine frugibus annos.

Parietis hac est parte alia depictus Ioseph,

Quem Luna, & quem Sol, vndenaq. sidera adorant.  
Non procul hinc astans spicarū huic fascis in agro est,  
Quem prono vndeni venerantur vertice fasces.  
Quæ portendebant Pharijs in partibus illum  
Regnaturum olim vice Regis; quem simul omnes,  
Frugum ob egestatem, fratres frumenta petentes  
Poplite adorarunt summisso Regis in aula.

Effet dum Ioseph tenebroso in carcere clausus  
Immerito, Deus hunc non illo tempore liquit.  
Aspicite hanc ambo læua de parte fenestram;  
Qua læta assurgit vitis propagine terna,  
Et iam purpureas vvas monstrare videtur;  
Et iuuenem pateram ingentem de more tenentem,  
Pocula qui miscet Regi, læuaq. prementem  
In solitum craterem vuam, Regiq. ferentem.  
Parte alia capitis sublimi in vertice rector  
Pistorum desert en terna canistra farine;  
Et summo in calathio sunt plurima liba, cibiq.  
Arte laborati, multæ quos vngue volantes  
Incuruo, rostroq. simul rapiuntque, vorantque.  
Hæc sunt quæ soluit socijs insomnia Ioseph,  
Vtrique ostendens propere ventura; graues nam  
Hic pœnas tulit; ast alter carchesia Regi  
Sueta ministravit, prius vt de more solebat.

Bersabee egressus Iacob, cum pergeret Aram,  
Venissetq. locum quendam, quo carpere vellet  
Optatos somnos, nox postquam frigida totum  
Cælum vmbra tegeret; lapides collegit, & illos  
Supposuit capiti, somno se dehinc dedit alto.  
Qui postquam est illo deuinctus lumina, vidit  
Tellure infixam scalam, quæ vertice celfo

Aequas



*Aequabat conuexa poli, iuuenesq. vicissim  
Ire, redire viam alatos; summumq. parentem  
Aeria innixum scala, & sua lumina versus  
Vertentem faciem Iacob, placideq. loquentem;  
Cui sese terram atque locum Deus ipse recepit,  
Quo somno sopitus erat, stirpiq. daturum.*

*Nabuchodonosor somnum dum duceret aureis  
Instratis tacitam per noctem insomnia vidit  
Dira, quibus gelidus tremor illum incessit, & amens,  
Solicitusq. magos regni quarebat, & artes  
Secretas doctos, aperire & somnia. Cunctis  
Chaldaeis ergo accitis Rex ipse, Magisq.  
Dira per obscuram sibi visa insomnia noctem,  
Ac se se oblitum quæ viderit, & penitus nil  
Se meminisse illis memorat: simul & iubet illos  
Somnia, quidq. sibi portendant dicere; dona  
Plurima promittens illis, atque vrbis honores,  
Si monstrare sibi possent ea somnia. Sed non  
Vllus erat toto in regno, qui dicere posset  
Illi eadem, quæ per noctem Rex ipse silentem  
Viderat, oblito penitus fera visa; dabantq.  
Hæc responsa omnes Regi: Dic, maxime Regum,  
Rex, nobis, quæ per nigram tibi somnia noctem  
Visa fuerit; eaq. ætutum soluemus; erisq.  
Liber ab his curis. cælestia numina solum  
Detegere hoc factum possunt; communia quorum  
Consilia, aut vllis hominum commercia non sunt.  
Tunc Rex ipsorum dictis turbatus in iras  
Exarsit; stridentemq. Magis decreuit, & vna  
Chaldaeis (insandum) animas effundere ferro.  
Hoc vbi decretum est, Urbem vaga fama repleuit*

Mærore, Euphrates liquidis quam perluit undis.  
Sed postquam hæc Vatis venit Danielis ad aures,  
Quem Rex, Hierusalem capta, perduxerat illuc  
Captiuum; subito rectorem orauit Olympi,  
Vt sibi detegeret, quæ Rex insomnia nuper  
Vidisset, gemino caperet dum lumine noctem.  
Cumq. ipsi pater omnipotens nocte ordine cuncta  
Monstrasset; subito narrat sua somnia Regi:  
Atque addit, quid significant ea visa. Sed ecce  
Hic statuam, quam Rex deuinctus lumina somno  
Vidit, terribili aspectu, nec corpore paruo.  
Huic caput ex auro puro est; venterq. femurq.  
Aere relucenti effulget: sunt crura rigenti  
E ferro; atque pedum pars est hæc fictilis, illa  
Pars chalybe e duro est. Hæc est, quam vidit, imago  
Contra se stantem Assyrijs regnator in oris.  
Ecce autem summo (vt cernis) vasto impete saxum  
Sponte sua de monte cadens, & ferrea crura,  
Permixtosq. pedes terra ferroque, caputq.  
Ex auro, pectusq. argento, & alium & femur ære  
Percussit; statua hæc ingens tunc fracta repente est;  
Atque sui casus vestigia nulla reliquit.  
Tum lapis immensum in montē est cōuersus, & omnem  
Compleuit iam mole sua spatia vltima terræ.  
Quattuor hæc statua alta notat ditissima regna:  
Primum est Assyrij Regis, qui somnia vidit,  
Quiq. suo imperio claram Babylona tenebat,  
Diuersosq. maris tractus, Eoaq. regna.  
Post hunc venerunt Mædi, Persæq. feroces.  
Tertia Alexandri Mæcedum sunt sceptrâ potentis.  
Vltima successit Romana potentia factis

Incluta; sed Caesar bello præclarus & armis  
 Pompeium illustrem factis superavit, & omnem  
 Obtinuit terrarum orbem post civilia bella.  
 Hic lapis excelso delapsus monte, ruensq.  
 Effigiem, haud hominum impulsu, nec viribus ullis,  
 Est Christus mundi vere Saluator, in aluo  
 Virginea, cuius se late extendit ad oras  
 Occiduas atq. Eoas durabile regnum:  
 Succedet cui non aliud; non alter habebit  
 Extremum hoc Rex imperium: nam rector Olympi  
 Huic nullas posuit metas, vel tempora regno.

Prostantem somnos, quem cernis, pectore Regem,  
 Ist Rex Nabuchodonosor, qui somnia, cum nox  
 Intempesta premit mortalia corda sopore,  
 Vidit, & exiit stratis perterritus aureis:  
 Iussit & (vt data lux calo est) vatesque, Magosq.  
 Acciri; atque illis memorat quæ viderat atram  
 Per noctem; quæ cum haud potuissent soluere Vates  
 Chaldaei, celebresq. Magi, quos victus aiebat  
 Regius; accersens Daniele talia fatur:  
 Solue mihi o Daniel, princeps celeberrime Vatum,  
 Somnia; nam te non unquam tua numina fallunt.  
 Arbor erat orbe in medio, pulcherrima visu,  
 Omnigenoq. gravis sætu, & signa ardua tangens  
 Vertice sublimi, & denso, spectantq. cadentem,  
 Surgentemq. diem terris; volucresq. volabant  
 Frondentes inter ramos: animalia habebant  
 Quæque suum ex ipsa nullo discrimine victum.  
 Ecce autem tenues horrenda voce per auras  
 Aliger e calo iuuenis descendit, & omnem  
 Incendit thalamum clamoribus; atque ita fatur:

Arbo-



Arboreum truncum succidite; stringite ramos;  
Et folia excutite in terram, & dispergite fructus:  
Atque fugam celerent quæcumque animalia subter  
Arboris hanc habitant umbram: migrate volucres  
Vos quoque; pœniteat nec vos hos linquere nidos:  
Radicum ast harum permittite viuere germen;  
Aereq. vincite, ac ferro; & dum sidera cælum  
Per noctem illustrant tingatur rore recenti:  
Cumq. feris gradiens pascatur graminis herbam;  
Donec eum supra mutentur tempora septem.  
In somnis sunt hæc quæ viderat Assyrius Rex.  
Consciis at veri Daniel, & numine plenus  
Aeterni Patris, Regi ventura retexit  
Omnia; quæ tanto mox euenere tyranno,  
Qui tunc innumeras gentes, & regna premebat  
Imperio, longe gemmis ditissima, & auro.  
Ille etenim pulsus regno, & ditione potenti  
Amissa, in siluis traxit vitamque, diesq.  
Inuisos; interq. feras edit, veluti bos  
Ruricola & fœnum & paleas noctesq. diesque.  
Casariesq. olim nardo perfusa fluenti,  
Aspera erat tactu, atque humeros, pectusq. tegebat:  
Atq. auium similis manibus concreuerat vncis.  
At postquam ille hominum nouit, rerumq. parentem  
Esse Deum, & Regem regum, tantiq. datorem  
Imperij; (terram Indorum nam solus habebat)  
Territus, & cælum aspiciens, pia verba locutus  
In laudem est Patris aeterni; redijtq. paternum  
In regnum, gratus populo, & primoribus vrbis.  
Aspicite oppressum hunc tarda, tristiq. senectæ;  
Qui veluti fessusq. via, longoq. labore

Sollicitas somno curas laxabat, acuta  
 Iuniperi sub fronde, via defessus. at illi  
 Nuntius abruptit somnum, de sedibus alti  
 Aetheris, atq. tulit panem, lymphamq. recentem;  
 Hortaturq. cibum vt capiat signisq. manuque:  
 Nempe senex est Elias, qui dormit in vmbra.  
 Ostenditq. aliam picto sub fornice partem,  
 Qua Deus omnipotens summo detrusit Olympo  
 Indignas habitare domos, cælumq. phalangas  
 Olim ausas Patris atherei sibi poscere honores.

Sunt multi aligeri iuuenes, pulcherrima pubes,  
 Et dilecta Deo: quorum vnum misit ab oris  
 Aethereis Pater omnipotens ad Virginis ades,  
 Quæ paritura foret sine labe Deumq. hominemque;  
 Et tenebris qui credentes, barathriq. profundo  
 Eriperet, caliq. illos transferret Olympo.  
 Hæc Virgo M A R I A est Solymorum electa puellas  
 Ante alias Patre ab æterno, rerumq. parente.

Post vbi Davidis iussu lustrasset Ioab  
 Israel ingentem populum, narrasset & illi  
 Ordine & Hebræam gentem, peditumq. cohortes;  
 Turbatus Rex indoluit, veniamq. petiuit  
 A Domino fusis precibus: qui protinus ipsum  
 Gad vatem ad Dauidem misit, vt de tribus vnum  
 Optaret cito venturum, bellumve, famemve,  
 Aut pestem. pestem elegit; posuitq. suam spem  
 In Domino, semper solito exaudire precantes.

Princeps militiæ cælestis Michael ensẽm  
 Vagina eductum dextra tenet, ancipitemque,  
 Sustinet atq. animas non æquo examine laua.

Cum vates Esaias vidisset Olympi

Vertice in excelsa radianti in sede sedentem  
 Et Dominum, Regemq. poli, terræque; locumq.  
 Maiestate sua plenum; sic territus inquit:  
 Væ misero mihi nunc, quoniam tacui, quoniam vir  
 Pollutus labijs ego sum; Regemq. Deumq.  
 Vidi exercituum his oculis; & versus ad illum  
 Vnus de cœtu Seraphim accessit, habensq.  
 Carbonem ignitum dextra, quem forcipe ab ara  
 Detulerat, dixit Vati: Labia en tua pruna  
 Hac tetigi, crimenq. tuum delebitur omne.

Parte alia iuuenis, qui iuxta altare Parentis  
 Stat pedes æterni, dextra sustentat acerram  
 Ex auro; cui tura ferunt Panchæa ministri,  
 Sanctorum vt de more preces fundat super aram  
 Auratam ante Dei solium, quæ tota renidet.

Effigiem iuuenis Raphael assumpserat olim;  
 Et tamquam qui carpit iter sub mane viator  
 Tobia genitum Rages perduxit ad urbem  
 Medorum; atque illum in sedem, patriamq. reduxit  
 Incolumem: secumq. tulit bis quinque talenta  
 Argenti, dederat Tobias quæ bonus olim  
 Gabello, sine spe lucri. Tenet hic quoque piscem  
 Hunc laua iuuenis, satanam quo exegit, & ipsi  
 Restituit lumen patri, solitumq. nitorem.

Oppida cum Latij passim, populusq. Quiritum  
 Peste laborarent sæua, legesq. silerent,  
 Mussarentq. artes medicæ; sacra publica Princeps  
 Gregorius plebi indixit, totiq. senatu;  
 Atque Urbis cessauit opus. Tunc protinus ille  
 Carpsit iter versus qua moles Aelia tollit  
 Se cælo, procerum sacro comitante senatu:

Virgi-



Virgineiq. chori circum alto pariete septi,  
 Orabant celi Dominum, ne linqueret Urbem  
 Inter tot rerum discrimina, totq. labores.  
 Diversiq. habitus aderant sacro ordine gentes:  
 Necnon & cœtus matrum per strata viarum  
 Orabant summis precibus, lacrymisq. Deum ne  
 Illos desereret vicino in limine leti.  
 Perq. vias primorum humeris defertur imago  
 Intactæ matris MARIÆ; quam laudibus omnes  
 Unanimes innumeris tollunt, fertisq. coronant.  
 Interea dum sacra canunt populusque, sacerq.  
 Delectorum hominum cœtus, de sede superna  
 Aliger adueniens Michael se ostendit in arce  
 Tunc Aeli, sua qua vestigia certa reliquit  
 Discedens; pestisq. abiit (mirabile visu)  
 Aeternoq. egere Patri per carmina laudes:  
 Et templi ornarunt postes, & limina myrto,  
 Atque alba, nigraq. hedera, lauroq. virenti;  
 Verbenaq. viam, & croceis sparsere genistis.  
 Deinde reportarunt Capitoli in culmina montis  
 Effigiem sacram MARIÆ, temploq. locarunt.

Armenti, & pecudum Ausonijs Garganus in oris  
 Diues erat, putremq. vno non vomere terram  
 Vertebat; nomenq. suo de nomine monti  
 Imposuit; cui nullus honos, neque gloria quondam  
 Vlla erat, aut nomen; qui nunc Garganus habetur,  
 Linquere suctus erat domini magalia taurus;  
 Exosusq. greges magnos, noua gramina solus  
 Depasci, & longe a socijs secedere semper.  
 Et cum sæpe greges, armenta, clausa silerent  
 In noctem, taurus non in stabula alta redibat.

Ast ubi Sol humentem umbram dimouit, & alma  
 Est data lux cælo, & terris, Garganius auitis  
 Estratis surgit, quærens per denia taurum:  
 Quem tandem inuenit nemoroso in vertice montis,  
 Speluncæ ante fores. Quidam iaculatus in ipsum  
 Est taurum. Sed quid dicam? Iaculata per auras  
 Hasta retro cessit stridens, reliq. petiuit  
 Auctorem. Nouitate rei, casuq. sinistro  
 Indigenæ non audebant accedere collem,  
 In quo taurus erat: verum periere magistrum  
 Sacra ministrantem populo; remq. ordine totam  
 Narrarunt. Ille ætutum de more coactio  
 Concilio, ternis ieiunia certa diebus  
 Indixit populo: ac Patrem postquam ille vocauit  
 In sua vota Deum precibus; tunc aliger atram  
 Illum per noctem admonuit, dixitq. supremum  
 Esse locum in tutela ipsi; & monstrasse recenti  
 Indicio; fieriq. nouum sibi velle ibi templum.  
 Dehinc Præses populum ad sese, ciuesq. vocauit,  
 Et stans in cætu medio factum omne rexit:  
 Atque alacres adiere locum; rupemq. videntes  
 Esse cauam in faciem templi, secere superbam  
 Aedem illic speluncam illam; Patriq. sacrarunt  
 Aeterno, dictam de nomine Michaelis,  
 Aligerumq. choris iuuenum, qui ferre parentis  
 In terras mandata solent per inania cæli.

Agricolis vates Abacuc pulmenta ferebat,  
 Qui campis segetes procurua falce metebant.  
 Aliger huic iussit cæli demissus ab oris,  
 Ut Danieli epulas Babylonem ferret in urbem,  
 Atque lacum. Cui respondit, Non est mihi nota

Urbs Babylon, non ipse lacus. Tunc vertice Vatem  
 Aliger apprehendit iuuenis, tenuiq. capillo  
 Illum pendentem magnam Babylonis ad urbem  
 Portauit; supraq. lacum, supraq. leones,  
 Quasæui stabulant, posuit; clamansq. superne  
 Daniele, dixit, Deus hæc tibi prandia mittit,  
 Que porto mecum alueolo. Tunc ille, Mei non  
 Oblitus Deus es, qui numquam linquis amantes  
 Ipsum te, positos diuerso in turbine rerum.

Dum bello premerent Iudæos Madianitæ;  
 Est illos Pater omnipotens miseratus, & ipsis  
 Auxilium tulit; & cali e regione ministrum  
 Ad Gedconem misit mandata ferentem;  
 Qui dum bella timet passim vastantia campos  
 Finitimos, ventis paleas iactabat inanes,  
 Exclusa & grauidis frumenta legebat aristis.  
 Militiæ, gentisq. suæ columenque, ducemq.  
 Vnum te elegit, bello & præfecit, & armis  
 Madianitas contra, Eoasq. phalagas  
 Omnipotens Deus, o Gedeon; sic nuntius insit.  
 His ille obstupuit dictis; mox talia fatur:  
 Quis nam ego sum, quem tu tali dignaris honore?  
 Est mea progenies Manasses infima gentis;  
 Ipse etiam stirpisq. meæ, fratrumq. meorum  
 Sum minimus. Cui respondit, Non est opus vllis  
 Consilijs; confide Deo; victoria cedit  
 Namq. tibi; & tanta populum formidine solues.  
 Quinetiam Domini te spiritus induct; & tu  
 Mentem aliam, viresq. alias in pectore sumes:  
 Atq. hostes cunctos paucis comitatus, & omnes  
 Madianitas gladio superabis acuto;



Tota phalanx veluti foret vno in corpore cernix.  
 Dehinc pugnae liquit victricia signa futura.  
 Nam lane ob gelidum rorem, qui lapsus ab aethra  
 Vellus erat madidum, tellusq. erat arida circum;  
 Nocte alia, celo cum fulgent sidera, lane  
 Siccum velus erat, passim rore humida tellus.

Caelestium iuvenes stantes in quattuor orbis  
 Partibus, vnanimesq. & strictis ensibus omnes,  
 Velle videbantur mundi hanc cuertere molem,  
 Et totum mortale genus, nemora alta, ferasque.  
 Parte alia sese tulit obuius vnus, eodem  
 Agmine, persimilisq. aspectu, atque oris honore;  
 Purpureo veniens radiantis Solis ab ortu:  
 Qui vetuit comites mundum hunc delere, hominesque,  
 Illorum frontes donec signentur ab ipsis  
 Aligerum cuneis, Domini qui iussa facessunt,  
 Qui meritis meruere suis celsa atria celi,  
 Optatam & faciem summi spectare parentis.

Postquam Rex Balac tentoria gentis Hebrae  
 Esse suis posita in terris trans fluminis undam  
 Iordanis, secum Pharijs quam duxerat oris  
 Moses, e specula longe prospexit, & omnem  
 Moabitarum populum formidine pressum;  
 Insignes virtute viros, & sanguine misit  
 Ad Balaam vatem, non ignarumq. futuri;  
 Hebraeo vt vellet populo maledicere, & illum  
 Detestari, ipsi promittens munera, honoresque.  
 At Balaam dum ferret iter subuectus asella  
 Ad Regem geminis pueris comitatus; in iras  
 Exarsit Pater omnipotens, misitq. ministrum  
 E celo, vt subito se se illi opponeret ense

Distrito, prohibens ultra procedere gressus  
 Quadrupedis. quæ cum prope se iam cerneret illum  
 Vagina eductum gladium toruo ore tenentem,  
 Inceptum detorsit iter, campumq. petiuit.  
 Quam Balaam actutum sumpto cogebat in ipsam  
 Fuste redire viam rectam: sed missus ab alto  
 Nuntius illam ipsam gladioque, minisq. vetabat  
 Vertere sese alio; sed carpere proxima prata  
 Cogebat. Quadrupes vbi sese opponere eunti  
 Conspexit iuuenem, cecidit. Tunc percitus ira  
 Est Balaam, atque illam percussit verbera multo.  
 Os asinæ hic Dominus soluit, quæ pauca locuta est:  
 Vatis & idem oculos immissa luce reclusit.

Tunc Balaam iuuenem iratum, ferrumq. tenentem  
 Vidit, adorauitq. tremens, veniamq. petiuit.

Sennacherib urbem longa obsidione premebat  
 Hierusalem, turmaq. equitum, peditumq. phalange  
 Cinxerat, & iam iam victoria cesserat illi:

Et spes obsessis euadere posse fluebat  
 Bellantum, Regisq. minas. tum cum attulit ipsis  
 Auxilium Pater omnipotens, fessisq. leuamen  
 Pugnando ob noctes vigilatas mœnia circum.  
 Nuntius e summo veniens descendit olympo,  
 Cum nox incubuit totis passim humida terris;  
 Assyriasq. acies ferro deleuit acuto.

Vidit mane nouo prostrata cadauera campis  
 Rex tristis; trepidusq. abiit, bellumq. reliquit;  
 Cum patrijs Ezechias regnaret in oris.

Astrorum varios ignes (mirabile visu)  
 Aspicite, aurato sunt hoc ca fornice tantum  
 Sidera, quæ nunquam propria statione moventur;

*Speſtantum quę longe animos, & lumina paſcunt;  
Ornamentum ingens Caprarolę, arcifq. ſuperbæ.*

*Chriſtophorus Cancrī inuenit ſub ſidere gentes:  
Hic polus extremos primus deuenit ad Indos.  
Deiicit Meſſicanam Cortefius urbem.  
Occaſum vidit Solis Magalanus, & ortum:  
Tempore nec longo totum circundedit orbem.  
Aurorę extremas adiit Veſputius oras.*

*Hic ſunt tres mundi partes; quarum inclyta longe  
Ob magnas Orientis opes, & maxima regna  
Eſt Aſia, Oceanus quam longe amplectitur vndis,  
Niluſque, Tanaiſque, gerit multa oppida, & vrbes  
Vertice ſublimi; atque premit dextro pede proram;  
Anchora ſub leuo poſita eſt, paterę aurea dextra eſt.*

*Europa hac etiam parte eſt, quę vertice toto  
Turrita eſt: orbem dextra gerit; atque ſiniſtra  
Fert enſem non diſtriſtum: puer vnus ariſtas  
Flauentes dextra aſtringit; puer & tenet alter  
Intortum dextra baculum; ſalcemq. ſiniſtra.*

*Africa, quę has geminas ſequitur, quę pelle elephātis  
Detraſta e capite illius ſua tempora cingit,  
Atque gerit dextra ſat magnum ſcorpion atrī  
Corporis; & portat laua autumnalia dona  
Ingenti ac nitido cornu; meſſuraq. parua  
Illius ante pedes poſita eſt, quę plena manipulis  
Frumenti eſt nondum tonſi cum culmine toto.*

*Americę eſt etiam mundi pars maxima, & iſtis  
Ditior, atque alijs ſparſis per cęrula terris  
Oceani; varijsq. coloribus imbuīt artus,  
Quos lana tegit intexta, cornuq. recuruo  
In terram verſat gemmas, auriq. talenta*



Plurima; & ante pedes pictis stat psitacus alis;  
 Atque latus iuxta partem medii tenet orbis:  
 Lucentesq. illam gemme, bacceq. coronant.  
 Illa etenim has inter forma est pulcherrima; quamuis  
 Fusca sit, & tumidis labris, crispoq. capillo;  
 Affixasq. gerat baccas, gemasq. profundo  
 Oceano inuentas passim; labijsque, genisque,  
 Naribus & patulis; & brachia vinciat auro;  
 Chrysolithoq. aures ornet, geminosq. cothurnos.  
 Hanc etiam ostendit partem, quæ continet omnes  
 Oceani salsos fluctus, & littora, & vrbes  
 Littoreas, nostrasq. intrantia marmora terras,  
 Oppidaque, magnasq. vrbes, montesque, lacusque.

Parte alia monstrat solucentes littore classem  
 Hesperio nautas italo duce, & alta secantes  
 Cærule, in occasum flectentes carbasa semper,  
 Et Parię inuentas ignoto in littore sedes:  
 Conuersamq. ratem geminas demonstrat ad Arctos;  
 Ingentemq. Osireem, mundi noua regna reperti,  
 Et fortunatas Cancris sub sidere terras.

Parte alia ostendit nostris incognita nautis  
 Sidera, & Austrinos tractus, Molucasq. repostas  
 Orbe alio; atq. docet cælo noua signa sereno.  
 Fundatam aspiciunt salsis in fluctibus urbem  
 Temistitanam non longe a littore Ponti.  
 Sunt Scaletę gentes, solitę connectere pennas  
 Corporibus auium auulsas, atque arte magistra,  
 Et pluma volucrum diuersa pingere vestes.

Illinc digressi tendunt qua parte labores  
 Alcideę effulgent gemini sub fornice picto.

His visis, linquunt auro radiantia tecta;

*Ad viridesq. hortos accliuo tramite tendunt.  
Sunt positæ his hortis patrio de marmore Nymphæ  
Quattuor astantes, manibus quæ & vertice saxum  
Ingens sustentant; spatijs cernuntur ubi hore  
Dispositæ, numerisq. suis; dum lumine terras  
Sol lustrat nitido; tendens per inania celi,  
Ausonii quibus vtuntur, Celteq. feroces.*

*Aspicite hanc turrim præcelsi culminis, in qua  
Copia librorum est ingens, delectaque, seu quis  
Voluere forte velit sacrorum oracula vatum;  
Aut lingue auctores Latine, monumenta q. Graium.  
Et sese sistunt alto sub fornice fontis:  
Hic ubi iam Leuce panem, generosaq. vina  
Addiderat mensis, atq. hædi integra ferebat  
Viscera, fumantesq. epulas: tum lance patenti  
Apponit lac concretum, post fraga, fauumq.  
Mopsopii mellis: comites dehinc fonte nitenti  
Sepe manus, sepe ora lauant; mirantur & ipsam  
Marmoream effigiem latices effundere ad auras;  
Haud aliter quam flumen aquæ loca saxea subter  
Delabens montis, cum valles venit ad imas,  
Visceribus terræ latices prorumpit ad auras,  
Diuersosq. suo gignit de gurgite riuos.*

*Inde alacres dapibus fontis vescuntur ad vndam;  
Atque epulas inter vario sermone fruuntur;  
Sideraq. ad cæli sedes, hortosq. ferebant;  
Atq. loci dominum Ladon æquabat Olympo  
Laudibus. At postquam dapibus consueta cupido  
Est exempta cibi, Siculus sic inquit Acestes:  
Dic hospes nobis celebratum carmen in oris  
Trinacrijs, laudans hortos, fontemque, locumq.*

Hunc celebrem, dum Sol celsi secat ætheris axes  
Iam medios, nec flat Zephyri levis aura per agros.

Tunc custos arcis: Fontem hunc laudavit Amylcon,  
Qui Mella pecudes patrij pascebat ad amnem;  
Et domini nunc versat oues prope Thybridis undas:  
Et cum falce metit maturas messor aristas,  
Hic etiam comitatur herum sua tella petentem  
Regia; & interdum subter canit hæc loca versus  
Frondea. Nunc elegos nostri cognoscite vatis.

DVM te muneribus tantis FARNESIVS heros,

Et te tam largo munere donat aquæ:

Quid tibi fons animi est? num te felicior alter?

Num te Castali j letior vnda fluit?

Præcipue dum Roma potens te inuisit, & omnis  
Ausonia, atque omnis Gallia, & Hesperia.

Miraturq. novos fructus, atque aurea poma,

Et virides hortos, quos tua lympa rigat;

Et varios latices, & te pulcherrime, qui tam

Sub gelido nitidas fornice claudis aquas.

Hæc loca erant olim saxosis aspera dumis;

Et nunc sunt pictis aurea porticibus.

Et qua custodes flumiorum & faucibus undas

In stagna effundunt dulcia, tophus erat.

Hic vbi nunc Dryadum rorantia cernitis antra,

Clinosum ornabant marmora nulla locum.

His olim arebant incultis collibus herbae,

Nullaq. de celsa rupe cadebat aqua.

Et qua nunc per stagna natant fluitantia pisces,

Abrupti moles saxea montis erat.

Quaq. suis Capra vberibus diffundit in auras

Tor liquidos latices, serupea silua fuit.



Imposuitq. suo nomen de nomine monti:  
Ex eodem pagus nomine nomen habet.  
Tergemini infantes hic sine colla iacentis  
Prensant, & palmis vbera plena premunt.  
Hinc lymphæ exiliens frondes ferit ictibus altas,  
Lambit & ætherei lucida signa poli.  
Et quoties quatiunt frondosa cacumina lymphæ  
Effusæ, quamuis sit sine nube dies;  
Apparet toties vario persusa colore  
Insidens Iris frondibus arboreis.  
Hanc circum folijs strepitant, cæcisq. salignis,  
Et canere hos latices velle videntur aues.  
Te non est fons lucidior, nec pulchrior ullus:  
Iam cedat rutila Lydius Hermus aqua.  
Quid tum si mixtas auro vehat amnis arenas;  
Illius & ripis lucida gemma micet?  
Si regit imperio dites gens barbara terras;  
Et flumini latices sæua læna bibat?  
Te gemine exornant Libyco de marmore Nymphæ;  
Nec non Oebalio marmore facta Venus.  
Cuius sub pedibus mons est, qui gurgite seruat,  
Cumq. libet rauco murmure fundit aquas.  
Tu geminis, & coralio, conchisq. refulges,  
Quas de Persarum littore nauta tulit.  
Sustentat manibus viuo de marmore labrum  
Cypria, quo latices accipit ipsa tuos.  
Et reddit quoties acceptos ipsa liquores,  
Euincit strepitu murmura Panthagiæ.  
Cum vero occultas diuersis partibus vndas  
Eiçtis, incautos proluit vnda viros.  
Tunc Satyrique, locusq. madent, Nymphæque, Venusque;  
Lapsaq.

Lapsaq. muscoso murmurat vnda lacu.  
 Nam fluis haud aliter, quam Vere nigerrimus vdo  
 Imber aquæ, & pluuia sicca madescit, humus.  
 Ipse tuas iuxta Princeps FARNESIVS vndas,  
 Dum capitur blando murmure dulcis aquæ:  
 Et cum Sol alto iam lustrat lumine valles,  
 Sen cum se vertit littus ad Hesperium:  
 Regales epulis mensas onerare ministros  
 Imperat, & fundi Massica vina iubet.  
 Sublatat at postquam lauris sunt pocula mensis,  
 Audis magnorum fortia facta patrum.  
 Atq. Ithacus citharam pulsat Terpander eburno  
 Teffine, dehinc alij carmina lata canunt.  
 Hic primas rerum causas; hic iura recenset;  
 Ille canit magni lucida signa poli.  
 Hic Graijs carius Musis, pariterq. Latinis,  
 Ad citharam Domino carmina digna refert.  
 Atque artes alijs perstringit carmine mutas;  
 Quæq. hominem lædat, vel inuuet herba, docet.  
 Describitq. alius cum magnis vrbibus oras  
 Oceani, & nostros, Itala regna, sinus.  
 Hic fortunatas Cancrî sub sidere terras,  
 Ductore inuentas, nuper ab Ausonio.  
 Hic hominum mutata nouas in corpora formas,  
 Et vectos nautas per freta longa canit.  
 Dat plausum circum agrestis per compita pubes;  
 Et Zephyri auditur per nemus aura leuis.  
 Visaq. sunt circum dulcedine cuncta moueri,  
 Et motare suas fraxinus alta comas;  
 Qua nos & somnum dulcem captamus, & auram,  
 Cum Sol ardenti lampade torret agros;

Cum nexæ arboribus rutilo sub Sole cicadæ  
 Hæc resonant rauco regia tectâ sono.  
 Non te proturbat pedibus vaga bucula, vel grex;  
 In te non pastor vellera mersat ouis.  
 Sed te pastores potant, & rustica pubes,  
 Et misces domino cymbia grata tuo,  
 Qui regit has circum terras ditione, locumque,  
 Atq. hoc, vt cernis, surgere iussit opus:  
 Egregium (nec fallor) opus, cui maxima Roma  
 Invidet; & tacito victa dolore silet.  
 Tunc horti custos Ladonem affatur, & inquit:  
 Audiſti quæ sit solitus memorare Menephron  
 Hospitibus, qui tectâ adeant sublimia magni  
 FARNESII, visuri hortos, fontesque, quibus me  
 Iudice & Alcinoi cedant & Adonidis horti,  
 Atq. Hippocrenes fons, & Parnasidos vnda.  
 Ostendam tibi cras etiam circumdata muro  
 Aerio nemora, & diuersa animalia passim,  
 Quæ pascunt & planiciem, vallesq. profundas.  
 His sunt tectâ locis agrestia, quæ tenet ipse  
 Rusticus; & quæ sunt etiam sub colle virenti  
 FARNESIUS colit: hæc spectant nemora omnia circû,  
 Atq. lacum, fontesq. simul: habitantq. sub altis  
 Arboribus volucres, quas Africa mittit, & ora  
 Phasidis, atq. Indi tractus. non hic vigil anser,  
 Non fulicæ, aut anates desunt; cygni. vagantur  
 Per riuos, nitidumq. lacum, fons lucidus in quem  
 Influit ornatus ripas bene olentibus herbis;  
 Qui vehit agmen aque secum per leuia saxa  
 Rauca sonans, miscetq. lacu se plurimus alto:  
 Hosq. feræ, volucresq. bibunt; fundaq. natantes

Hic



Hic illic alius captat, vel arundine pisces:  
Et cursu lepores, canibusq. sagacibus, imas  
Per valles premere in foveas vel in abdita tentat  
Retia; deinde fugam trepidis immittere cervis.  
Seuus aper non turbat aquas fontive, lacuve  
Immissus: non has silvas aut vrsa, lupusve  
Incolit; ast hospes captat securus in umbra  
Ilicea dulces, posita formidine, somnos;  
Et fontem ad gelidum dapibus epulatur inemptis,  
Ipse locum quotiens dominus sua tecta reuisit,  
Incinguntq. lacum platani miro ordine: namq.  
Carpere iter poteris medio fervore sub umbra,  
Non umbra sub iuniperi, taxive, graves cum  
Terrarum tractus æliis æstibus hiscunt.  
Non desunt vites peregrinæ, præcipue quas  
Afferri iussit Dominus de collibus altis  
Cenomanum, & Rheni ripis, non cedere cellis  
Ausonijs vnquam solitæ; firmissima quamvis  
Vina ferat Campanus ager, collesq. propinqui.  
Et quamvis sub matre alia, ac sub sidere vites  
Sint positæ, atq. alio sint sub cultore, tamen non  
Degenerant, succosve suos, aut nomina mutant.  
Hic alia de parte iacet parva insula, parvo  
Sed vitreo præcincta lacu; quem cum canis æstu  
Icarius proscindit agros, seu gramina frigus  
Acre ferit, læditque, suis cum flatibus asper  
Non parcit Boreas, foliorum ridet honore  
Ob non decussum, glacialesq. increpat auras.  
In medio fons est gelidus, quem mille coronant  
Gramina odorati floris; quem laurus inumbrat,  
Arboreisq. comis myrtus: semperq. recentes

Fundit aquas, vitreasq. caua de rupe, rigatq.  
 Perpetuo flores, vicinaq. gramina circum:  
 Et tellus sicco non supplicat arida celo.  
 Parietibus paruis veluti FARNESIVS arcem  
 Hunc nitidum incinxit (visu mirabile) fontem.  
 Despectare licet latices, quibus innatat undis  
 Squamea gens deuecta mari, deuecta q. multis  
 E lacubus, fluuijsque, lenis non præda, saporq.  
 Haud homini ingratus. sunt atq. sedilia viuo  
 E saxo circa fontem; quo ducere cenam  
 FARNESIVS sæpe est solitus, uel prandia; semperq.  
 Hunc circum vicina canunt auararia dulci  
 Gutturæ, & altorum nemorum concentibus umbras  
 Diuersis implent: nec apum per opaca susurri  
 Arbuta deficiunt. nec parua est copia florum,  
 Quos seruant virides ripæ fontisq. lacusque,  
 Prataque, fragrantescq. horti, chortisq. volucres  
 Rimantur valles, perq. herbida prata vagantur,  
 Cernere quàm suaue est gallinas ducere multos  
 Pascua per, densumq. nemus, viridesq. genistas,  
 Quorum oua incubuere, alio sed semine, pullos.  
 Hæ veluti tamen hos proprio de sanguine natos  
 Semper alunt, ætas donec iuuenilis adultos  
 Fecerit, & fugere edoctos, seq. abdere tectis;  
 Hos numquam linquunt: quin si delabitur alto  
 Miluius, hosq. petit dum proxima pascua carpunt,  
 Aut strætæ ad Solem vicina in rupe morantur;  
 Erumpunt clamore omnes factò agmine, & ipsos  
 Ceu matres passis alis, rostroq. tuentur;  
 Et trepidè obijciunt in aperta pericula s. se.  
 Sunt aliæ volucres etiam, ceu femina paup,

Quæ densis se se siluis abstrudit, ibiq.  
Oprat inaccessas latebras, quibus abdere sese  
Possit, & occultis sua ponere sepibus oua.  
Cum vero redit hæc consueta in tecta, reducit  
Progeniem secum parvam, quæ scindere pennis  
Aerium nondum audet iter. tunc rustica custos,  
Credita cui volucrum cura est, nemorumq. virentum,  
Latatur spectare suo sine munere prolem  
In cæli tenues auras venisse, capitq.  
Hanc manibus, gremioq. fouet, dat & oscula fronti.  
Turba anatum gallinam alia de parte sequuntur  
Per prata, at longū haud tempus: nā post ubi lymphas  
Conspexere, ruunt alacres, & corpus in undas  
Dant iactu, haud suctæ pedibus discernere ab ipso  
Pulvere triticeas fruges; sed carpere pisces  
Ingenio, & gelidis atatem extendere siluis.  
Quinetiam cygni, atq. anates, & candidus anser,  
Prata per, umbrosūq. nemus, vallesq. pererrant,  
Pascunturq. ruat donec nox humida, & omnes  
Terrarum picea inuoluat caligine tractus.  
Mox subeunt viuos latices; placidumq. soporem  
In medijs ducunt undis sub nocte serena.  
Pauones picea captant super ilice somnos,  
Nocturni tamquam vigiles, vocemq. repente  
Horrendam vnanimes subter nemora ardua fundunt,  
Si forte has circum nocturnus obambulet hostis,  
Insidians miseris; qui sucti nare serenos  
Per soles, soliti & mærorum scandere pinnas,  
Cunctaq. tecta domus percurrere: cetera turba  
Alituum sua tecta petunt diuisa sub altis  
Fornicibus, quas claudit annus custodia, necnon

Villicus,



Villicus, & nati pariter, non paruula pubes.  
 Nemo vnquā has numerat; volucrū nā copia magna est:  
 Farre anus has nutrit, sparsq. legumine, nota  
 Voce vocans, cum Sol surgit, lucemq. reducit:  
 Et picturatas includit picta columbas  
 Turris, quæ Domini celsas supereminet ædes.  
 Hæ mixtæ alitibus viuunt, pullosq. ministrant.  
 Parte alia veniunt ad dulcia pocula vaccæ  
 Triginta numero, haud solitæ proscindere aratro  
 Tellurem, aut perferre iugum, neq. ducere plaustrā:  
 Sed tantum in nitidam vitulos educere lucem,  
 Hosq. alere, atq. implere nouo mulctraria lacte;  
 Cum Sol se attollit, & cum nos respere linquit.  
 Vnquam nec mensis Domini desit tepidum lac,  
 Non tepesactum igni, vaccæ sed ab vbere pressum.  
 Quid memorem celebre aucupium? cum tempore toto  
 Autumni, capimus volucres noctemq. diemque:  
 Per noctem laqueis, sub solis lumina visco:  
 Vnde domum portant famuli, vernæq. coronas  
 Turdorum, & volucres captas sub imagine noctis:  
 Et certis ducunt conuiuia læta diebus.  
 Tunc illi latices vbi Capra effundit in auras  
 Vberibus loca celsa petunt; illisq. Lycormas  
 Planiciem ingentem, vallesque, atq. oppida centum,  
 Montesque, variasq. vrbes ostendit, & insit:  
 Prospectum hunc pascentem animos en cernite, circū  
 Quem tot vicini colles, siluæq. virentes  
 Non tollunt oculis hominum, non saxea rupes,  
 O socij. seges hæc partim oportuna Falerno,  
 Partim frumento grata est. nascuntur oliuæ  
 Collibus his. sunt & pecori gratissima mille

Pascua:

Pascua: sunt liquidi fontes; gratoq. per imas  
Conualles gelidi labuntur murmure riuī.

Cantu auium resonant ripæ; fructusq. ministrant  
Agrestes nemora alta; quibus venator in vmbribus  
Setigeros venatur apros, damasq. fugaces.  
Cannabis haud deficit texendis retibus apta.  
Hic lini segetes; illic nascuntur auenæ.

Sunt populi assueti belloque, & frangere glebas:  
Aut Lacedæmonia membra exercere palastra;  
Et iaculo, insidijsq. leues impellere ceruos,  
Inq. plagas, laqueosque, acri comitante Molosso.  
Sunt & iuniperi his siluis; morusq. cruenta:  
Necnon Chaoniæ, ciuilia præmia, quercus.  
Hic est ferales pompas uisura cupressus:  
Pinus & æquoreas perferre assueta procellas.  
Hic etiam platanus nigrantes proiicit vmbas:  
Punica mala tegunt altos pendentia muros,  
Haud secus ac aulae solent tegere atria Regum:  
Necnon Medorum veteres referentia siluas  
Citria, odoratos semper seruantia flores;  
Pomaq. non gelidi metuentia frigora Cauri.  
Hic myrto viret, & lauru densissima sepes,  
Candida quam grauidis hedera intertexta corymbis  
Implicat, in nodumq. simul complexa quietem  
Dat fessis securam auibus, quæ Sole cadente,  
Et surgente canunt, volitantq. hæc arbuta circum.

Hic pingues Damon sero sub vespere turdos  
Captat, & agrestes excelsa in rupe palumbes.  
Hincatque hinc arguta canunt auicularia pictis  
Alitibus, nox cum terras obscura relinquit.  
Hic rites pretis, atque Apiana vmbacula texunt,

Vna quibus croceum ducit matura colorem;  
 Robustus quamuis nondum flauentibus aruis  
 Agricola inducat messorum, & messor aristis  
 Supponat falcem, postquam est operatus in agris.  
 Parte alia semper floret silua aurea densis  
 Arboribus, quas iamdudum niger Alpheſibæus  
 Circeò de colle iulit. sunt pruna Damasci,  
 Quæ pendent semper ramis, rubroq. colore,  
 Et croceo, viridique, calor dum feruet, & æſtas;  
 Autumnusq. licet fructus collegerit omnes.  
 Sunt & Crustumie siluæ, rubicundaq. poma,  
 E Libyco deuicta sinu, & felicibus aruis,  
 Qua Sarnus liquido montem rigat amne Veseui.  
 Inducit circum hos hortos umbracula palmes  
 Massicus, & Thasie procerò robore vites.  
 Sunt variegatus ficus fecundo e Tybure missæ,  
 Tybure maliferis cui gloria surgit ab aruis.  
 Illis hortis semper flores terra educat alma:  
 Namq. parit quæcumq. ferunt ea tempora in hortis,  
 Vere rosas, alioq. alios pro tempore flores;  
 Et scauam Autumno casiam, spicamq. Amaranthi;  
 Cæruleosq. hieme in media, brumq. hyacinthos.  
 Non desunt violæ, cythisque, & lutea caltha:  
 Non smilax, floresq. croci, non baccharis herba;  
 Atq. meliphylon; Cerinthæ & gramina: cumq.  
 Solstitia aduentant æstiva, bibernaque, late  
 Ridet humus florente thymo, & bene olente per hortos.  
 Et, mirum dictu, si vulgo copia florum  
 Larga thymi est, liquidi mellis portenditur ingens  
 Proventus fore purpureis venturus in hortis.  
 His tepidis violæ alba locis sata, prima nouum Ver



Nuntiat ante alios flores, post tempora brumæ,  
 Floret at illa tamen, circumq. effundit odorem.  
 Tantum humana valet vis, & clementia puri  
 Aetheris, & terræ vbertas. nam noscere morbos  
 Hortorum innumeros, non cura est parua colenti;  
 Et quæ Solis amat radios, aut arboris umbram,  
 Aut rara gaudet terra, aut fugit herba liquores;  
 Et quæ mane nouo, vel sero vespere fontes  
 Herba sitit, vel cum Solis secat athera lampas;  
 Me docuit quondam a teneris Oenotrius Agmon.

Castaneæ siluam hanc seuit FARNESIUS alta  
 Hac specula, qua collis erat non paruus, & aspris  
 Cotibus, & spinis paliuri obductus acutis.

Aspice vt exurgunt procero stipite caules.  
 Non campen folia ipsa timent, morsusq. sequacis  
 Pullicis, aut gelida flauescunt cana pruina.  
 Hoc surgunt generosa humili plantaria colle.  
 Hic locus est, quo tu varijs pendere sub ipsis  
 Arboribus varios fructus æstate videbis;  
 Quorum aliquos grauis autumnus maturat apricis  
 Collibus; aut concreta gelu Bruma horrida crines:  
 Diuersisq. modis arbor est insita, quæ fert  
 Diuersasq. nuces, diuersaq. poma sub auras.  
 His impune locis ruam fert insita vitis,  
 Quæ fert diuersum vini genus; & rubet ruæ  
 Arboreis semper ramis; delapsa licet sint  
 Iam folia, & campos exurat frigus, & herbas.

Sunt Bruma hic tepidi Soles; & cum canis vrit  
 Icarius calum & terras, his spirat in oris  
 Montanis levis aura, æstusq. his montibus arcet.

His hortis miro positi sunt ordine flores:

Et sata quæq. suas gremio fouet area plantas.  
Hic nec oportet apum cellas transferre quotannis  
Ob frigus penetrale hiemis: nam terra recentes  
Submittit flores nostro sæcunda labore.  
Non desunt apibus violaria, flos nec Amelli,  
Atq. recens apium, serpillaque, sunt & Acanthi  
Vimina, nec thymbræ, nec myrti copia desit.  
Hic riuus salices: tiliam, pinosq. ministrat  
Vicinum nemus, & liquidis late hortus abundat  
Fontibus, vt cernis, Ladon; crassæq. paludis  
Non circum hos colles grauis est odor, at lenis aura;  
Dulcis & has gelidis persundit flatibus oras.  
Et talpa euertens hortos his exulat oris;  
Et bufo infestus semper pubentibus herbis.  
Non fert helleboros, nec noxia galbana tellus,  
Non taxos: non formicæ nouæ semina rodunt,  
Nec mus asparagus sub terra absconditus alta.  
Asper in his nostris haud horret carduus hortis:  
Sed cithysus, calthæq. virent, & lilia cana.  
Nocturnæ volucres hortis, & sepibus absunt;  
Nec populantur aues præduro semina rostro.

Hæc dicens collem ascendit, qui plurimus horto  
Imminet; & varios fructus monstrabat eunti.  
Vt vero videre viri quæ dixerat hospes,  
Irriguos fontes diuerso e tramite ductos,  
Vicinisq. locis constructo fornice lympham  
Eductam, quæ florentes interluit hortos,  
Et quæ progeniem gignit per stagna natantum;  
Consedere simul qua fons sonat Aegocrenes,  
Quem circum virides vmbre cinguntq. teguntq.  
Castanæ celso pulsantes vertice nubes.

Tunc Ladon ait: O comites, nos hic locus umbris  
 Arborcis circumseptus, murmurq. per auras  
 Rauca sonantis aque, caueisq. inclusa volantum  
 Turba animum canere inuitant: sed nos vetat altum  
 Aethera per summa astra parans accendere Vesper,  
 Sideream & lucem venienti infundere nocti.

O vtinam ipse meis meritas equare canendo  
 Carminibus laudes FARNESI, atq. inclyta possem  
 Facta tui, quem Roma colit pulcherrima, & omnis  
 Ausonię tellus, & cęlo laudibus infert.  
 Et quoties patrijs carmen modulabimur oris,  
 Nunquam FARNESIAE memores gentisque, tuiq.  
 Non erimus: nosq. has sedes ad celsa feremus  
 Sidera carminibus nostris, quę nauita longe  
 Audiet, & pastor habitans in montibus illis:  
 Et nostras littus voces vtrumq. remittet;  
 Vicinaq. rupes illius nomina discent;  
 Et repetent eadem siluarum nomina quercus,  
 Vos vero circum dulces saluete recessus:  
 Vos quoq. pampinei colles, & grata poetis  
 In loca, FARNESIVS vestras postquam incolit oras;  
 Pręcipue cum maturis flauescit aristis  
 Campus, & Erigones scindit canis arua, gregesq.  
 Vallibus in Pindi pascit prope frigida pastor  
 Flumina, nec cęli letalia sidera curat;  
 Saluete eternum: nam vos placidamq. quietem,  
 Et totos sine nube dies, noctesq. serenas  
 Affertis domino, recipit cum sessus ab Vrbe  
 (Quam lymphis secat intortis vetus Albula) sese  
 In Caprareole tractus, arcesq. superbas.  
 Quid dicam? memoranda tui sunt commoda raris:



Quæ si quis numerare velit, velit ætheris idem  
 Astrorum numerare ignes, quot & induat ornus  
 In frondes se Vere nouo, Zephyriue sub ortu.


Interea dum nos patrias habitabimus oras,  
 Et lætos nemorum colles; tu maxime rerum  
 Omnipotens Pater hunc serua venientibus annis.  
 O vtinam liceat nobis redeuntibus olim  
 Cernere ALEXANDRVM sacrata in sede tenentem  
 Sceptra, quibus positas patrijs in collibus arces  
 Felici ditione regat, populosq. Quirini.  
 Finierat, cum iam passim surgentibus vmbis  
 Cedebat, terrasq. sua sine luce, polumq.  
 Paulatim Sol decedens linquebat, & oras  
 Oceani, Hesperiosq. amnes iam pronus adibat.

F I N I S.



D 3 IN AD

IN ADVENTV SVMMI  
PONT. GREGORII XIII.  
AD ARCEM CAPRAROLAE.



ASTORVM primus, nemorumq.  
armenta Lycormas  
Per Cimini pascens valles, & culmina;  
postquam  
GREGORIVM sensit illuc accedere,  
qui nunc

Temperat immensum diuinis legibus orbem,  
In Caprarolæ sedes, arcemq. superbam;  
Lætitia exultans muscosa in rupe tanebat,  
Et tales alto referebat pectore voces:  
(Dum vero caneret, iuuenum chorus omnis ad antrum  
Astitit, & venti circum posuere, nec vnda  
E fonte irriguo fluxit, nec garrula progne,  
Aut alia assuetos cantus exercuit ales,  
Mugitu ve truces ruperunt carmina tauri.)

Salve hominum tutela ingens, nemora ardua cuius  
Aduentu circum exultant, & pastor ad alta  
Sidera lætatus siluis noua carmina fundit.  
Te fontes, siluæq. colunt; tibi florida prata  
Submittunt varios texenda in sorta colores:  
Lætitia atq. alacres ludunt per prata iuueni;  
Custodesq. tenet pecudum, siluasq. voluptas.

Quàm lator venisse diem, quem sæpe Phyletas  
Prædixit quondam venturi hand inscius æui:

Pastor

Pastor erit, pingues sub quo per prata iuueni,  
 Et vigili custode greges latissima carpent  
 Gramina, & optatos Thyberina ad flumina somnos.  
 Non Auster flauas mixta cum grandine fruges  
 Proteret, effusum aut flumen feret hordea secum :  
 Nec segeti lolium, gregibusve aconita nocebunt .  
 Ergo purpureos in aprico colle racemos  
 Latitia ostentant vites ; & lata colores  
 Ante diem rutilos siluis pomaria ducunt .  
 GREGORIVM ingeminat passim per compita pubes :  
 Respon sant gelidæ rupes, & nomen amati  
 Pastoris late referunt ; montesq. canoras  
 Per siluas voluunt, & per iuga frondea voces :  
 Et baccis hederæ, & niuei redimita ligustri  
 Flore comas pubes campis incedat apertis  
 Rustica, & huic noua sacra canant per rura, domosque.

O superi, date nunc vati memorabile carmen ;  
 Atq. illi maiora meis concedite votis.  
 Viue precor Pater alme, diu, & feliciter ; & nos  
 (Vt facis) æternum solito sub numine serua.  
 Interea his terris longum expectate, subibis  
 Aurea nunc mea tecta, olim loca consita dumis :  
 Quæ tua sunt, si me tanto dignabere honore .

Dixit ubi hæc supplex inflexo poplite pastor,  
 Latitia circum fontes saliere ; nouumq.  
 Effulsit lumen siluis, & plausibus antrum  
 Insonuit, sunt & dulcedine visa moueri  
 Gramina, & aprici flores ; hortosque, domumq.  
 Surgentem implerunt varijs concentibus auræ.

F I N I S.

D 4



IN FONTES HORTO-  
RVM CAPRAROLAE  
EPIGRAMMA.

✠❧❧❧✠

**H**ic folia hæc inter iaculatur Capra liquores;  
Atq. Irim variolympha colore refert.

Aliud.

Quam nos Castalio fonti concedimus, hospes,  
Tam fontis cedit qualibet vnda mihi.  
Ars decorat structos si quos e marmore fontes,  
Huic operi, & nostris cedat imaginibus.

Aliud.

Ipse ego Tyrrheni quondam maris incola Thaumās,  
Nunc placida vmbrosis collibus antra colo:  
Et dulces lymphas effundere letor ab ore,  
Et freta, & æquoreas deseruisse domos.

Aliud.

Cerneret vt fontem hunc Amor alta Cythera reliquit,  
Fessus & ad gelidæ marmura dormit aquæ.

Aliud.

Vos quoque liquistis, pueri, Cyprumque, Gnidumque:  
Et tecta incolitis regia FARNESII.

Aliud.

Vicinas liqui rupes, vt fonte recenti

Miscerem

Miscerem domino vina Capena meo:  
Cum probibent hortis vaga flamina ponere mensas,  
Aut niger e cælo cum cadit imber aque.

## Aliud.

Frondosus nemorum latebris succede, viator,  
Quæ fontis latices non grauis umbra tegit:  
Mox bibe, & hic siluis somnum cape; namq. per herbã  
Vipera non errat, nec latet anguis aqua.

## Aliud.

Hos latices ne accede meos, nec tange, viator;  
Sanguine fœdata est si tua dextra manus.  
Nostrę etenim lymphę misceri cędibus horrent:  
Grataq. Amynei munera montis amant.

## Aliud.

Vespere quę virides hortos, & mane rigabat  
Deducta e varijs per caua saxa locis:  
Nunc domini mensis carchesia miscet; & aures  
Detinet arguto garrula lymphe sono.

## Aliud.

Sum Cimina ante alias fama notissima lymphas,  
Cerulea quę in lucem lilia sola rigo.  
Namq. amat hæc dominus; clypeoq. insigne vetustum:  
Lilia cęruleo picta colore gerit.

## Aliud.

En Satyri, Nymphęq. caua sub rupe, viator,  
Plurima qua celso fornice lymphe cadit.

Atq. lacum delapsa facit, ceu maximus imber;  
 Antraq. non paruo murmure pulsa sonant.  
 Hos fluit in latices declivi riuulus vnda,  
 Purior electro, frigidiorq. gelu.  
 Dum cessant latices, ludunt ceu per mare pisces:  
 Dumq. pluit, taciti per caua saxa latent.  
 Hic Satyri, & Nymphę procero corpore latis  
 Sustenant humeris pondera tanta suis.  
 Omnia quę longe demirans aduena dixit,  
 Rarum opus hoc struxit quis, nisi FARNESIVS?

## IN FONTEM CRYPTAE FERRATAE.

**S**EPTENOS peteret colles cum Iulia lympha,  
 Quos vetus intortis Albula scindit aquis:  
 Capta loci insignis forma est, beneolentis & horti,  
 Et rupis, platani quam leuis vmbra tegit.  
 Dixit &, hic mihi certa domus: vos tecta valete  
 Regia: cumq. tuo Thybride Roma vale.

### Aliud.

Florentes rigat hos hortos aqua Iulia, nec non  
 Tepula, quę quondam peterent cum celsa Quirini  
 Mœnia, & alluerent septem, ceu flumina, colles,  
 Errauere diu iam sæuo a milite fractis  
 Fornicibus, has per valles, nemorumq. recessus.  
 At postquam in partem sedes hæc regia cessit  
 FARNESIO, cum Romanam non posset ad urbem;



*Ad patriosq. lares dulces perducere lymphas;  
Hoc rarum construxit opus, geminosq. reduxit  
In liquidum hunc fontem latices, hortosq. locumq.  
Silvarum indigenis vna cum fonte dicauit.*

**Augurat opera sua fore diuturna.**

*Te cecini, Caprarola, procul notissima nostris  
Carminibus, nitidam lucem qua Sol vehit, & qua  
Discedens linquit miseris mortalibus umbras;  
Et quo Christophorus sulcans maria alta Columbus  
Deuenit positas Cancrī sub sidere terras;  
Atq. nouum terrarum orbem, nouaq. astra retextit,  
Astra prius nostris non visa, aut cognita nautis.  
Te Dacus, populiq. legend, qui torrida regna,  
Cyniphiasq. colunt ripas. non ipsa nocebit,  
Quamuis tarda, tibi sæclis venientibus ætas.  
Te tolles fama illustrem super æthera: tuq.  
FARNESII æternum viues sub Principis aura.  
Ipse ego in ætheream lucem prope flumina Mellę  
Editus, & multis versutus notus in oris,  
Non sine laude ferar præcinctus tempora lauro  
Docta per ora virum. Cecini nam primus ad vndam  
Oceani errantes diuersa per æquora nautas:  
Et fortunatas alio sub sidere gentes.  
Et versa in varias descripsi corpora formas,  
Post vātem, patria est cui Sulmo vberimus vndis:  
Et Leucem expositam, Daphnimq. e littore Lesbi  
Thybridis ad ripas, Tyrrhena & ad æquora duxi.  
Atq. urbem Venetam cecini; & fera bella gygantum.  
Me dicente etiam fies tu nobilis inter  
Ausonias arces, arx o Caprarola, tibiq.*

*Cedens*

Cedent Pyramides, cedent & Adonidis horti,  
 Fontesque, interq. aerias tecta aurea silvas,  
 Regis opus, quæ enituit Phæacia tellus.  
 Nam neq. marmoris, auroq. incisa columnis  
 Nomina clara Ducum, doctis vel picta tabellis  
 Effigies vera illorum, quam pinxit Apelles,  
 Hos immortales faciet, si lingua silebit  
 Lætæa scriptorum felici carmine vatum.  
 Et nec Pyramides, structæve in littore moles  
 Baïarum, iratoq. mari, quæ vertice vincant  
 Aera, & excisi montes, & montibus arces  
 Impositæ haud longum possunt se extendere in ævum,  
 Ob varios rerum euentus, rerumq. ruinas.  
 Scripsisset nisi Mæonides, non clarus Vlysses  
 Insidijs, non eloquio Neleius heros,  
 Non Teucrum Aeacides terror. non facta Quiritum  
 Magnanimum quæquam nosset belloque, togaq.  
 Incluta; scriptorum si pagina docta sileret.  
 Historijs alijs dixere pedestribus arma  
 Aspera, deuictasq. acies, artemq. colendi  
 Tellurem; & rerum causas, aut sidera; & orbem:  
 Aut inuas medicina artes, aut ciuica iura.  
 Sed ne tu Caprarola time volitare per oras  
 Externas, simul & nostras: nam me quoq. amarunt  
 Ausonij vates; nec me spreuere canentem  
 Thybridis ad ripas, patrijve ad flumina Mellæ.  
 Nec dubita, multos tua fama extendet in annos  
 Se (reor vt) si quid poterunt mea carmina; nomen,  
 Nomen honoratum Domini, venientibus etas  
 Temporibus numquam falsa rubigine tangeat.

F I N I S.

AD ALEXANDRVM  
Cardinalem Farnesium.



O S flores, dum bruma gelu riget aspra  
per agros,  
Dat tibi serpillio vinctos, hederaq. vi-  
renti,  
Gambara fecundi custos Laurentius  
horti.

Hos fouit tepidum ad Solem. Tu semper habebis  
Et primos horti flores, primosq. hyacinthos,  
Et tibi primitias ruris, siluaq. quotannis  
FARNESI venerande feram: tu roscida poma  
Autumno, mellisq. fauos sub sidere verno  
Accipies, & sit rudis hæc mea pagina quamquam,  
Te tamen ante alios canet, & tibi floreaserta  
Intexet, quoties hortos, mea regna reuises.  
Hic ubi odoratos tellus latissima flores  
Educat, & dulcis celo diffunditur aura,  
Tu mecum e gravidis carpes poma aurea ramis.  
Fiscellam pressi lactis tibi Romulus Alcon  
Afferet, & plenis benevolentiaserta canistris.  
Te ruris decor omnis amat, vallesq. recurue:  
Flumina te, ripæq. vocant; tibi florida prata  
Submittent varios texenda inserta colores.  
Ipse sedens molli vates Melibæus in herba  
Sanguineis intexta rosis, tibi lactea nectit  
Lilia, narcissum, rutiliq. comas amaranthi,



Te tuus ad liquidos fontes longæuus *Amilcon*  
 Lanigeri oblitus pecoris, rerumq. suarum,  
 Te solum cupit absentem. Sed nec mihi rura  
 Ipsa placent sine te, nec nostro grata recessus  
 Otia, nec Latia vates euoluere linguæ,  
 Iudice vel sine te laudabile condere carmen.  
 Ne sedes horresce meas, licet horrida calo  
 Regnet hiems : his hospitij non frigora regnant:  
 Et nos sublimis rupes defendit ab alto  
 Surgentis Boreæ flatu: tegit ardua laurus  
 Vestibulum; tuguriq. fores, aditumq. patentem:  
 Et tibi pro Borea, gelidis pro flatibus auræ  
 Spirabunt: pro purpurea niue vestiet arua  
 Terra parens viridante coma, tibi floribus herbæ  
 Halabunt, Verisq. ferent violaria sætus.  
 Grata tuis proavis tibi cærule lilia tellus  
 Fundet humo, quibus æquiparet non se rosa, non se  
 Pubescens coma Narcissi, non lutea caltha,  
 Quodq. legit longæuus Arabs beneolentibus aruis;  
 Illa geret donec clypeo domus inclyta gentis  
 FARNESIAE, viuentq. tui sub numinis aura.  
 Non illis æstas, nec hiems incana nocebit,  
 Non Aquilo, non imbriferis Notus impiger alis.  
 Hic ubi sæpe canit choreas, & gaudia Dirum  
 Zanchius : aut campos spatiantem narrat Alethem  
 Mirantem cæli tractus, atq. ætheris oras,  
 Et mundi verum auctorem, rerumq. parentem.  
 Dumq. canit, Siculus Sampson percurrit eburno  
 Pælline fila lyre, quem circum Aeneia pubes  
 Exultat, spargitq. locum fragrantibus herbis:  
 Et vaturn chorus assurgit, plauditq. canenti.

*Sæpe venit nostros Calaber Sirletus ad hortos,  
 Et tepida sub rupe sedet, qua fons sacer ima  
 Valle fluit, raditq. leui cum murmure rupem,  
 Et scelerum pœnas, & præmia certa bonorum,  
 Aeterniq. patris cælestia regna recenset.  
 Mox sacrę legis fontes, nodosq. resoluit,  
 Quos gens (infandum) gelido porrecta sub axe  
 Inuoluit cecis tenebris, Erebiq. profundo.  
 Riuus aquę has ambit sedes, atq. aggere cello  
 Nocturnos arcet fures; hic margine ab alto  
 Pascentes per prata licet spectare iuuenços,  
 Quos inter certant calamis, & carmine læti  
 Pastores, aut certa ineunt certamina cursus:  
 Aut curuant arcus, & tela Cydonia torquent.  
 Victori assistit iuuenum manus omnis, & ipsum  
 Ad metam ingenti plausu deducit onantem;  
 Et crines cingit sertis, & præmia soluit.  
 Tunc late loca curua sonant, qua noster agellus  
 Aurea prospexit vicina palatia cælo,  
 Nec non Mygdonio surgentem marmore fontem:  
 Romanę decus Urbis, & ingens munus IULI.  
 Parte alia, qua decurrunt Anicna fluenta,  
 Dulcia formosi miraberis otia ruris.  
 Esse etenim non vrbe potest, rerumq. tumultu,  
 Vt ruri Ver purpureum: tu namq. videbis  
 Post ubi te, comitesq. tuos mea tecta tenebunt  
 Ire dies alios, alium lucescere Solem;  
 Et dices, Valeant vrbes, & tu quoq. Roma.  
 Omnia quę nunc sponte tuus tibi Gambara dono  
 Concedit, Dominumq. facit florentis agelli.*

F I N I S.









